

摘藻堂四庫全書薈要

史部

欽定四庫全書薈要

史部  
通志卷一百五十三

詳校官員外郎臣楊世綸



欽定四庫全書薈要卷九千七十一

史部

通志卷一百五十三

宋右迪功郎鄭樵漁仲撰

傳第六十六

封隆之

封隆之

子子繪

子繡

弟子孝琬

李元忠

子搔

從姊法行

元忠

從祖弟

崔暹

子達

崔陵

子瞻

渾

渾弟繪

繪弟緯

文

仲文弟子侃

孫騰

高隆之

司馬子如

子侃弟子約

膺之薛琚

楊惛

燕子獻

陽休之

從祖弟斐  
斐從叔昭

李稚廉

李翥

王昕

弟晞

皓崔昂

崔季舒

高德正

尉瑾

封隆之字祖裔小名皮渤海蓐人也父回魏殿中尚書  
莊帝初河陰遇害隆之性寬和有度量起家奉朝請延  
昌中道人法慶作亂冀方自號大乘衆五萬餘隆之以  
開府中兵參軍與大都督元遙往討之隆之禽獲法慶  
賜爵武城子爾朱兆據晉陽魏朝以河內要衝除隆之  
龍驤將軍河內太守屬爾朱兆入洛莊帝幽崩隆之以

父回殞於爾朱氏常懷報雪因此遂持節東歸圖為義  
舉時高乾告隆之曰爾朱暴逆禍加至尊弟與兄等荷  
先帝殊眷豈不出身為主以報讎雪恥乎隆之對曰國  
恥家怨痛入骨髓乘機而動今實其時遂與乾定計夜  
襲冀州城剋之乾以隆之素為鄉里所信乃推為刺史  
隆之盡心慰撫衆情感悅尋聞神武自晉陽東出隆之  
遣子子繪奉迎於滏口神武嘉之既至信都集諸州郡  
督將僚吏等定議討爾朱氏隆之深贊之中興初拜驃

騎將軍吏部尚書神武將擊爾朱兆等於韓陵留隆之  
鎮鄴城爾朱敗走召為侍中進位儀同三司封安德郡  
公于時朝議以爾朱榮宜配食明帝廟庭隆之議曰榮  
為人臣親行弑逆安有害人之母而與子對食之理考  
古詢今未見其議詔隆之參議麟趾閣以定新制又贈  
其妻祖氏范陽郡君隆之表以先爵富城子及武城子  
轉授弟子孝琬等朝廷嘉而從之後為斛斯椿等構之  
於帝逃歸鄉里神武知其誣召赴晉陽天平初復入為

侍中預遷都之議孝靜詔為侍講除吏部尚書元象初  
除冀州刺史加開府累遷尚書右僕射及北豫州刺史  
高仲密將叛陰通消息於冀州豪望使為內應輕薄之  
徒頗相扇動詔隆之馳驛慰撫遂得安靜文襄密與隆  
之書云仲密枝黨同惡向西者宜悉收其家累以懲將  
來隆之以為恩旨既行理無退改今若收治示民不信  
脫或警擾所虧益大乃啟神武事遂得停隆之自神武  
唱義首參經畧奇謀祕策密以聞啟手書削藁罕知於

外以本官為齊州刺史卒贈司徒神武以隆之勲追榮未盡復啟贈太保諡宣懿神武後至冀州北境次於交津追憶隆之顧謂司馬子如曰封公自出納軍國垂二十年契闊艱難始終如一以其忠信可憑方以後事託之何期報善無期奄從物化言念忠賢良可痛惜為之流涕令以太牢祭焉隆之歷事五帝以謹素見知凡四為侍中再為吏部尚書一為僕射四為冀州刺史每臨冀部州中舊齒咸曰我封公復來其得物情如此子子



繪嗣子繪字仲藻小名搔性和理有器局釋褐祕書郎  
累遷平陽太守加散騎常侍晉州北界霍山舊號十里  
徑者山坂高峻每大軍往來士馬勞苦子繪請於舊徑  
東谷別開一路神武從之仍令子繪修開旬日而就徵  
補大行臺吏部郎中神武崩祕未發喪文襄以子繪為  
勃海太守執其手曰誠知未允勲臣官望但須鎮撫且  
衣錦晝游古人所貴宜善加經畧不勞習常太守向州  
參也仍聽收集部曲一千人大寧三年為都官尚書高

歸彥作逆命子繪參贊軍事事平敕子繪權行州事徵  
拜儀同三司右僕射卒諡曰簡子實蓋襲子繪弟子繡  
位霍州刺史陳將吳明徹侵淮南子繡城陷送揚州齊  
亡後逃歸終於通州刺史子繡外貌儒雅而使氣難犯  
兄女壻司空婁定遠為瀛州刺史子繡為勃海太守定  
遠過之對妻及諸女讌集言戲微有褻慢子繡鳴鼓集  
衆將攻之定遠免冠拜謝久之乃釋隆之弟興之字祖  
胄經明行脩恬素清靜位瀛冀二州刺史平北府長史

所歷有當官譽卒以隆之佐命功贈殿中尚書雍州刺史諡曰文子孝琬字士蒨七歲而孤為隆之鞠養慈愛甚篤隆之啟以父爵富城子授焉位東宮洗馬卒贈太府少卿孝琬性恬靜頗好文詠太子少師邢邵七兵尚書王昕並先達高才與孝琬年位懸隔晚相逢遇分好遂深孝琬靈櫬言歸二人送於郊外悲哭悽慟有感路人孝琬弟孝琰字士先少脩飾學尚有風儀位祕書丞散騎常侍聘陳使主在道遙授中書侍郎還坐受魏收

屬牒其門客從行事發付南都獄決鞭二百除名後除  
并省吏部郎中南陽王友赴晉陽典機密和士開母喪  
託附者咸往奔哭鄴中富商丁鄒嚴興等並為義孝有  
一士人亦在哭限孝琰入弔出謂人曰嚴興之南丁鄒  
之北有一朝士號咷甚哀聞者傳之士開知而大怒其  
後會黃門郎李瓌奏南陽王綽驕恣士開因譖之曰孝  
琰從綽出外乘其副馬捨離部伍別行戲語時孝琰女  
為范陽王妃為禮事因假入辭帝遂決馬鞭一百放出

又遣高阿那肱重決五十幾死還鄴在集書省上下自此沈廢士開死後為通直散騎常侍後與周和好以為聘周使副祖珽輔政奏入文林館撰御覽孝琰文筆不高但以風流自立善談戲威儀閑雅容止進退人皆慕之以祖珽好自矜大佞之云是衣冠宰相異於常人近習聞之大以為恨尋以本官兼尚書右丞其所彈射多承意旨時有道人曇獻者為皇太后所幸賞賜隆厚車服過度又乞為沙門統後主意不許但太后欲之遂得

居任然後主嘗憾焉因僧尼他事訴者辭引曇獻上令  
有司推劾孝琰案其受賄致於極法其家珍異悉以沒  
官由是正授右丞仍奏門下事性頗簡傲不諧時俗意  
遇漸高彌自矜誕舉動舒遲無所降屈識者鄙之與崔  
季舒等以正諫同死子君確君靜二人徙北邊少子君  
嚴君贊下蠶室南安敗君確等二人皆坐死興之弟延  
之字祖業少明辯有世用封郟城子位青州刺史多所  
受納後行晉州事沙苑之敗延之棄城北走以隆之故

免其死卒贈尚書左僕射司徒公諡文恭子纂嗣隆之族父述字君義父軌魏廷尉少卿述有幹用天平中為三公郎中時增損舊事為麟趾新格其名法科條皆述所刪定齊受禪累遷大理卿清河三年敕與錄尚書趙彥深僕射魏收尚書陽休之國子祭酒馬敬德等議定律令歷位度支五兵殿中三尚書述久為法官明解律令議斷平允深為時人所稱而厚積財產一無分饋雖至親密友貧病困篤亦絕於拯濟朝廷物論甚鄙之外

貌方整而不免請謁回避進趣頗致嗤駭前妻河內司馬氏一息為娶隴西李士元女大輸財聘及將成禮猶競懸違述忽取所供養像對士元打像為誓士元笑曰封公何處嘗得應急像須誓便用一息娶范陽盧莊之女述又經府訴云送騾乃嫌脚踏評田則云鹵薄銅器又嫌古廢皆為財賄所及每致紛紜子元請位太子舍人述弟詢字景文闕涉經史頗以清素自持位尚書左丞濟南太守歷官皆有幹局才具臨郡甚著聲績隋開



皇中卒

李元忠趙郡平棘人也曾祖靈魏洛州刺史鉅鹿公祖  
恢長安鎮副將贈定州刺史父顯甫豪俠知名集諸李  
數千家於殷州西山開李魚川方五六十里居之顯甫  
為其宗主以軍功賜爵平棘子位河南太守贈安州刺  
史諡曰安元忠少厲志操粗覽書史及陰陽術數有巧  
思居喪以孝聞襲爵平棘子魏清河王懌為營明堂大  
都督引為主簿遭母憂去任歸李魚川嘗亡二馬既獲

盜即以與之在母喪哭泣哀動旁人而飲酒騎射不廢  
曰禮豈為我初元忠以母多患專心醫藥遂善方伎性  
仁恕無貴賤皆為救療家素富在鄉多有出貸求利元  
忠焚契免責鄉人甚敬之孝莊時盜賊蜂起清河有五  
百人西戍還經南趙郡以路梗共投元忠奉絹千餘疋  
元忠唯受一疋殺五牛以食之遣奴為導曰若逢賊但  
道李元忠遣如言賊皆舍避及葛榮起元忠率宗黨作  
壘以自保坐於大樹樹下前後斬違命者凡三百人賊

至元忠輒却之葛榮曰我自中山至此連為趙李所破  
則何以能成大事乃悉衆攻圍執元忠以隨軍賊平就  
拜南郡太守好酒無政績及莊帝幽崩元忠棄官潛圖  
義舉會神武東出元忠便乘露車載素箏濁酒以奉迎  
神武聞其酒客未即見之元忠下車獨坐酌酒擘脯食  
之謂門者曰本言公能招延雋傑今聞國士到門不能  
吐哺輟洗其人可知還吾刺勿復通也門者以告神武  
遽見引入觴再行元忠取箏鼓之長歌慷慨歌闋謂神

武曰天下形勢可見明公猶欲事爾朱乎神武曰富貴皆由他安敢不盡節元忠曰非英雄也高乾邕兄弟曾來未是時高乾邕已見神武給曰從叔輩麤何肯來元忠曰雖麤並解事神武曰趙郡醉使人扶出元忠不肯起孫騰進曰此君天遣來不可違也神武乃復留與言元忠慷慨流涕神武亦悲不自勝元忠進從橫之策深見嘉納又謂神武曰殷州小無糧仗不足以濟大事冀州大藩若向冀州高乾邕兄弟必為明公主人殷州便

以賜委冀殷合滄瀛幽定自然弭從唯劉誕黠胡或當  
乖拒然非明公之敵神武急握元忠手而謝焉時殷州  
刺史爾朱羽生阻兵據州元忠聚衆與大軍禽斬之神  
武即令行殷州事累遷太常卿殷州大中正後以從兄  
瑾年長以中正讓之魏孝武納神武女為后詔元忠致  
聘於晉陽每宴席論舊事元忠曰昔日建義轟轟大樂  
比來寂寞無人問更欲覓建義處神武撫掌笑曰此人  
逼我起兵賜白馬一疋元忠戲曰若不與侍中當更覓

建義處神武曰建義不慮無止畏如此老翁不可遇耳  
元忠曰止為此翁難遇所以不去因將神武鬚大笑神  
武悉其雅意深重之後神武奉送皇后仍田於晉澤元  
忠馬倒良久乃蘇神武親自撫視封晉陽縣伯後為光  
州刺史時州境災儉人皆菜色元忠表求賑貸被報聽  
用萬石元忠以為少遂出十五萬石賑之事託表陳朝  
廷嘉而不責徵拜侍中元忠雖處要任初不以物務干  
懷唯以聲酒自娛大率常醉家事大小了不關心園庭

羅種果藥親朋尋詣必留連宴賞每挾彈攜壺遊遨里  
閭每言寧無食不可使我無酒阮步兵吾師也孔少府  
豈欺我哉後自中書令復求為太常卿以其有音樂而  
多美酒故神武欲用為僕射文襄言其放達常醉不可  
委以臺閣其子搔聞之請節酒元忠曰我言作僕射不  
勝飲酒樂爾愛僕射時宜勿飲酒每言於執事云年漸  
遲暮乞在閑冗以養餘年乃除驃騎大將軍儀同三司  
曾貢文襄玉蒲桃一盤文襄報以百鰓其見賞重如此

孫騰司馬子如嘗詣元忠逢其方坐樹下葛巾擁被對壺獨酌庭室蕪曠使婢卷兩褥以質酒肉呼妻出衣不曳地二公相視歎息而去大餉米絹受而散之俄復以本官領衛尉卿卒有米三石酒數斛書籍藥物充滿架篋未及賻至以金蟬質絹乃得斂焉贈司徒諡曰敬惠初元忠將仕夢手執炬入其父墓中夜驚起甚惡之旦告其受業師師占云大吉可謂光照先人也竟如其占性甚工彈彈桐葉嘗出一孔擲棗栗而彈之十中七八



嘗從文襄入謁靜帝有梟鳴殿上文襄命元忠彈之問  
得幾丸而落對曰一丸奉至尊威靈一丸承大將軍意  
氣兩丸足矣如其言而落之子搔嗣搔字德沈少聰明  
有才藝曾采諸聲別造一器號曰八絃時人稱有思理  
武定末自丞相記室除河內太守居數載流民盡復代  
至將還都父老號泣追送二百餘里生為立碑終於儀  
曹郎從姊曰法行幼好道截指自誓不嫁遂為尼所居  
去鄴三百里往來恒步在路或不得食飲水而已逢屠

牽牛脫衣求贖泣而隨之雉兔馴狎入其山居房室齊  
亡後遭時大儉施糜粥於路異母弟宗侶與族人孝衡  
爭地相毀尼曰我有地二家欲得者任來取之何為輕  
致忿訟宗侶等慙遂讓為閑田元忠從祖弟渾字季初  
祖綜行河間郡早卒父遵字良軌有業尚為魏冀州征  
東府司馬京兆王愉冀州起逆遵遇害贈幽州刺史諡  
曰簡渾以父死王事除給事中時四方多難仍謝病求  
為青州征東府司馬與河間邢邵北海王昕俱奉老母

攜妻子同赴青齊未幾而爾朱榮入洛衣冠殲盡論者  
以為知幾時河北流移人聚青土衆踰二十萬共劫河  
間邢杲為主起自北海襲東陽青州刺史元世儁欲謀  
誅之府人遂猜貳渾乃與長史崔光韶具陳禍福由是  
歃血而盟上下還睦普泰中崔社客反於海岱攻圍青  
州詔渾為都官尚書東北道行臺赴援社客宿將多謀  
詐諸城各自保固堅壁清野時議有異同渾曰社客賊  
人之根本烏合之衆易離若揀練驍勇銜枚夜襲咄嗟

之間便可禽殄如社客就禽則諸郡可傳檄而定諸將遲疑渾乃決行未明達城下賊徒驚散生禽社客斬首送洛海隅清定以功授光祿大夫天平初丁母憂行喪冢側殆將滅性武定初兼散騎常侍聘梁使主梁武謂之曰伯陽之後久而彌盛趙李人物今實居多常侍曾經將領今復充使文武不墜良屬斯人使還為東郡太守以贓賄徵還文襄使武士提以入置諸庭渾抗言曰將軍今日猶自禮賢邪文襄笑而舍之天保初除太子

少保時邢邵為少師吏部尚書楊愔為少傅論者榮之  
以參禪代儀注賜爵涇陽縣男文宣以魏麟趾格未精  
詔渾與邢邵崔陵魏收王昕李伯倫等修撰渾嘗謂魏  
收曰雕蟲小技我不如卿國典朝章卿不如我尋除海  
州刺史土民反共攻城城中多石無井常汲於外賊絕  
其路城內先有一池時旱久涸渾齋戒朝服祈請俄而  
天雨泉流涌溢賊皆駭散渾捕斬其渠帥傳首鄴都後  
以妾在州納賄坐免官卒于鄴子湛字處元涉獵文史

有家風為太子舍人兼通直散騎常侍聘陳使副襲爵  
涇陽男渾與弟繪緯俱為聘梁使主湛又為使副是以  
趙郡人士目為四使之門繪字景文年六歲便求入學  
家人以偶年俗忌弗許繪輒竊其姊筆牘用之未踰晦  
朔遂通急就章内外異之及長儀貌端偉神情爽儁繪  
舅河間邢晏與繪清言歎其高遠謂若披雲霧如對珠  
玉宅相之寄良在此甥時敕祕書監常景選儒學十人  
緝撰五禮繪與太原王義同掌軍禮魏靜帝於顯陽殿

講孝經禮記繪與從弟騫裴伯茂魏收盧元明等俱為  
錄議繪素長筆札尤能傳受緝綴詞義簡舉可觀歷中  
書侍郎丞相司馬每霸朝文武總集對揚王庭繪嘗先  
發言端為羣僚之首音辭辯正風儀都雅聽者悚然文  
襄益加敬異又掌儀注武定初兼常侍為聘梁使主梁  
武問繪高相今在何處黑獺若為形容高相作何經略  
繪曰黑獺遊魂關右人神厭毒連歲凶災百姓懷土丞  
相奇略不世畜銳觀時攻昧取亡勢必不遠梁武稱善

繪與梁人汎言氏族袁狎曰未若我本出自黃帝姓在十四之限繪曰兄所出雖遠當近車千秋分一字耳一坐皆笑前後行人皆通啓求市繪獨守清尚梁人重其廉潔使還拜平南將軍高陽內史郡境舊有三虎民常患之繪欲修檻遂因鬪俱死咸以為化感所致皆請申上繪曰虎因鬪而斃自是偶然貪此為功人將窺我竟不聽高陽舊多陂淀繪至後淀水皆涸乃置農正專主勸課墾田倍增家給人足瀛州三郡人俱詣州請為繪



立碑于郡街神武東巡郡國在瀛州城西駐馬久立使  
郎中陳元康喻慰之曰孤在晉陽知山東唯卿一人用  
意及入境觀風信如所聞但善始令終將位不次河間  
守崔謐恃其弟暹勢從繪乞麋角鵠羽繪答書曰鵠有  
六翮飛則沖天麋有四足走便入海下官膚體踈嬾手  
足遲鈍不能近追飛走遠事佞人是時文襄使暹選司  
徒左長史暹薦繪既而不果咸謂由此書及文襄嗣業  
普代山東諸郡其特降書徵者唯繪與清河太守辛術

二人而已至補大將軍從事中郎遷司馬文襄以前司徒侯景進賢冠賜繪曰卿但直心事孤當用卿為三公莫學侯景叛也及文宣嗣事仍為丞相司馬天保初除司徒右長史繪質性方重未嘗趣事權門以此久而沈屈卒贈南青州刺史諡曰景子君道有父風繪弟緯字乾經少聰慧有才學與舅子河間邢昕少相倫輩晚不逮之位中大夫聘梁使主侍中李神儁舉緯為尚書南主客郎緯前後接對凡十八人頗為稱職鄴下為之語

曰學則渾縉緯口則縉縉渾文襄攝選以縉為司徒諮  
議參軍謂曰自郎署至此所謂不次以卿人才故有此  
舉耳梁謝蘭來聘縉勞之蘭問安平諸崔縉曰子玉以  
還雕龍絕矣崔暹聞之怒縉詣門謝之暹上馬不顧縉  
語人曰雖失要人意聘梁使不得舍我武定五年兼散  
騎常侍使梁縉嘗逸遊放達自號隱君蕭然有絕塵之  
意使還除太子家令卒贈北徐州刺史諡曰文

崔暹字季倫博陵安平人漢尚書寔之後魏光州刺史

挺之族孫也世為北州著姓父穆州辟主簿暹少為書  
生避地渤海依高乾以妹妻其弟慎慎後臨滄光二州  
啓暹為長史委以郡事趙郡公琛鎮定州辟為開府諮  
議隨琛往晉陽神武與語悅之以無丞相長史神武舉  
兵將入洛留暹佐琛知後事謂之曰丈夫相知豈在新  
舊軍戎事重留守急切家弟年少未閑事宜凡百後事  
一以相屬握手殷勤至於三四琛後以罪被責暹亦黜  
免尉景為并州起暹為別駕文襄代景轉暹為開府諮

議仍行別駕事從文襄鎮撫鄴都加散騎常侍遷左  
吏部郎領定州大中正主議麟趾格遲親遇日隆好薦  
人士言邢邵宜任府僚可以兼管機密文字文襄因以  
召邵甚見親重言論之際邵遂毀遲文襄不悅謂遲曰  
卿說子才之長子才專言卿短此癡人也遲曰子才言  
遲短遲說子才長皆是實事不可謂癡高慎之叛偽與  
遲有隙神武後知之欲發其事而殺遲文襄苦救得止  
武定初遷御史中丞選畢義雲盧潛宋欽道李愔崔瞻

杜蕤嵇暉鄺伯偉崔子武李廣皆為御史世稱其知人  
文襄欲假暹威勢諸公在坐朝令暹後通名因待以殊  
禮暹乃高視徐步兩人擎裾而入文襄分庭對揖暹不  
讓席而坐觴再行便辭退文襄曰下官薄有蔬食公少  
留暹曰適受敕在臺檢校遂不待食而去文襄降送之  
旬日後文襄與諸公出之東山遇暹在道前驅為赤棒  
所擊文襄回馬避之暹前後表彈尚書令司馬子如及  
尚書元美殷州刺史慕容獻又彈太師司州牧咸陽王

恒并州刺史司馬淳道元冀州刺史韓軌罪狀極筆並

免官其餘死黜者甚衆神武書與鄴下諸貴曰崔暹昔  
事家弟爲定州刺史後爲吾兒開府諮議及遷左丞吏  
部郎吾未知其能也始居憲臺乃爾糾劾咸陽王司馬  
令並是吾對門布衣之舊尊貴親昵無過二人同時獲  
罪吾不能救諸君其慎之神武如鄴羣官迎迓於紫陌  
神武握暹手而勞之曰往前朝廷豈無法官而天下貪  
婪莫肯糾劾中尉盡心爲國不避豪彊遂使遠邇肅清

羣公奉法小兒才輕任重非中尉何有今日榮華富貴  
直是中尉自取高歡父子無以相報賜遲良馬使騎之  
以從且行且語遲下拜馬驚走神武親為擁之而授轡  
魏帝宴於華林園謂神武曰朝廷之中有用心公平直  
言彈劾不避親戚者王可勸酒神武降階跪而曰唯御  
史中尉崔暹一人謹奉明旨敢以酒勸并臣所射賜物  
千段乞回賜之帝曰崔中尉為法道俗齊整遲謝曰此  
自陛下風化所加大將軍臣澄勸獎之力於是文襄亦



催暹酒神武親為之拊文襄退謂暹曰我尚畏羨何況  
餘人神武將還晉陽又以所乘馬加綵物賜暹由是威  
名日盛內外莫不畏服神武崩未發喪文襄以暹為度  
支尚書監國史兼僕射委以心腹之寄暹憂國如家以  
天下為己任文襄盛寵王昭儀欲立為正室暹諫曰天  
命未改魏室尚存公主無罪不容棄辱文襄意不悅苦  
請乃從之文襄車服過度誅戮變常言談進止或有虧  
失暹每厲色極言文襄亦為之止臨淮王孝友被文襄

狎愛數歌舞戲謔於前顧見遲輒斂容而止有獄囚數  
百文襄盡欲誅之每催文帳遲故緩之不以時進文襄  
意釋獲免司州別駕司馬仲粲中從事陸士佩並被文  
襄毆擊付獄將餓殺遲送食藥為致言而釋之自出身  
從官嘗日晏乃歸侵曉則與兄弟問母之起居暮則嘗  
食視寢然後至外齋對親賓論事或與沙門辯立理夜  
久乃還一生不問家產魏梁通和要貴皆遣人隨聘使  
交易遲惟寄求佛經梁武帝聞之為繕寫以幡花寶蓋

贊唄送至館焉然好大言調戲無節嘗密令沙門明藏著佛性論而署己名傳之江表子達拏年十三遲令儒者權會教其說周易兩字乃集朝貴名流命達拏坐高坐開講同郡睦仲讓陽為屈服遲喜擢仲讓為司徒中郎鄴下為之語曰講義兩行得中郎仲讓官至右丞此皆遲之短也文宣初嗣霸業司馬子如韓軌等挾舊怨言遲罪重高隆之亦言宜寬政網去糾察法官黜崔遲則得遠近人意文宣從之及踐阼譖毀之者猶不息帝

乃令都督陳山提舍人獨孤永業搜暹家甚貧賈唯得  
神武文襄與暹書千餘紙多論經國大事帝嗟賞之仍  
不免衆口乃流暹於馬城晝則負土供役夜則置諸地  
牢歲餘奴告暹謀反鑠赴晉陽窮驗無實先是文襄疑  
文宣佯愚慮其有後變將陰圖之以問暹暹曰嘗與二  
郎俱在行位試以手版拍其背而不瞋乃將犀手版換  
暹竹者自揩拭而翫視之以是知其實癡不足慮也帝  
既鑠暹責其往昔打背暹自陳所對文襄之言明已功

以贖死帝悟曰我免禍乃遲之力釋而勞之使行太原  
郡事遷太常卿謂羣臣曰崔遲清正天下無雙卿等不  
及也初文襄欲以最小妹嫁與遲子達拏會崩遂寢至  
是讌於宣光殿羣臣多在焉文宣謂遲曰賢子達拏甚  
有才學亡兄長女樂安公主魏帝外甥勝朕諸妹思成  
大兄宿志故欲作婚姻乃以主降達拏遲尋遷中書監  
兼并省右僕射是時法網已嚴官司難於剖決繫獄者  
千餘人遲初上省便大錄囚旬月間斷雪略盡文襄時

欲封暹神武亦欲封之暹並固辭文宣數出游多至暹宅以暹女為皇太子妃李后不可乃止天保八年遷尚書右僕射儀同三司時調絹以七丈為足暹言之乃依舊帝謂左右曰崔暹諫我飲酒過多然我飲酒何所廢恒山王私謂暹曰至尊威嚴多醉太后尚不能致言吾兄弟亦杜口僕射獨能犯顏內外深相感愧十年卒帝撫靈哭之贈開府儀同三司尚書左僕射定州刺史諡曰貞節達拏溫良廉謹有學識位儀同三司司農卿周

御府大夫大象中使鄴屬尉遲迴起兵以為總管司馬迴平伏誅初文宣嘗問樂安公主達拏於汝何似答云甚相敬唯阿家憎兒文宣令宮人召達拏母入而殺之投漳水齊滅達拏殺主以復讎

崔陵字長儒清河東武城人也父休魏七兵尚書陵狀貌瓌偉善於容止少有名望為當時所知初為魏宣武挽郎解褐太學博士累遷散騎侍郎坐事免歸鄉里冀部豪桀之起召陵兄弟陵中立無所就高敖曹以五百

騎劫取之以為師友神武至信都以為開府諮議參軍  
歷給事黃門侍郎衛將軍神武入洛議定廢立太僕綦  
儁盛言節閔帝賢明可主社稷悽作色而前曰若其賢  
明自可待我高王徐登九五既為逆胡所立何得猶作  
天子若從儁言王師何名義舉由是節閔及中興主皆  
廢更立平陽王是為孝武以建義功封武功縣公領黃  
門加驃騎大將軍悽居門下恃預建義旗頗自矜縱尋  
以貪污為御史糾劾逃還鄉里時清河多盜文襄以石



愷為太守令得專殺愷經懷宅謂少年曰諸郎輩莫作賊太守打殺人懷顧曰何不答府君下官家作賊止捉一天子牽臂下殿捉一天子推上殿不作偷驢摸犢賊及遇赦出復為黃門天平中授徐州刺史給廣宗部曲三百人清河部曲千人懷性暴慢寵妾馮氏長且姣家人號曰成母朝士邢子才等多姦之至是假其威勢恣情取受風政不立初懷為常侍求為修起居注或曰魏收可懷曰收輕薄徒耳更引祖鴻勳為之既為樞要又

欲陷收不孝之罪乃以盧元明代收為中書郎由是收  
銜之及收聘梁過徐州陵備刺史鹵簿迎之使人相聞  
收曰勿怪儀衛多稽古力也收語蹇急報曰崔徐州建  
義之勲何稽古之有陵自以門伐素高特不平此言收  
乘宿憾故以此挫之罷徐州除祕書監以母憂去官服  
終兼太常卿轉七兵尚書清河邑中正陵有文學偉風  
貌寡言辭端凝如神以簡貴自處神武言崔陵應作令  
僕恨其精神太適趙郡李渾將聘梁名輩畢萃詩酒正

懽悽後到一坐無復談話鄭伯猷歎曰身長八尺面如  
刻畫聲效為洪鐘響胸中貯千卷書使人那得不畏服  
悽以籍地自矜嘗與蕭祇明少遐等高宴終日獨無言  
少遐晚謂悽曰驚風飄白日忽然落西山悽亦無言直  
曰爾每謂盧元明曰天下盛門唯我與爾傳崔趙李何  
為者哉崔暹聞而銜之神武葬後悽又竊言黃頴小兒  
堪當重任不遲外兄李慎以告暹暹啓文襄絕悽朝謁  
悽要拜道左文襄發怒曰黃頴兒何足拜也於是鑱悽

赴晉陽訊之不服遲引邢子才為證子才執無此言悽  
在禁謂邢曰卿知我意屬太丘不邢出告悽子瞻曰尊  
公意正應欲結姻陳元康瞻有新生女乃許妻元康子  
元康為言於文襄曰崔悽名望素重不可以私語殺之  
文襄曰若免其性命當徙之遐裔元康曰悽若在邊或  
將外叛以英賢資寇敵非所宜也文襄曰既有季珪之  
罪還令輸作可乎元康曰元康嘗讀崔琰傳追恨魏武  
不弘悽若在作所而殞後世豈道公不殺也文襄曰然

則柰何元康曰陵合死朝野皆知公誠能以寬濟猛特輕其罰則仁德彌著天下歸心段孝先亦言陵舊勲乃捨之陵進謁奉謝文襄猶怒曰我雖無堪忝當大任被卿以為黃領小兒金石可銷此言難滅天保初除侍中監起居以禪代之際參掌儀禮別封新豐縣男回授第九子約陵一門婚嫁皆衣冠美族吉凶儀範為當時所稱婁太后為博陵王納陵妹為妃敕中使曰好作法用勿使崔家笑人婚夕文宣舉酒祝曰新婦宜男孝順富

貴陵跪對曰孝順出自臣門富貴恩由陛下五年為東  
兗州刺史復攜馮氏之部為馮厭蠱頗失精爽尋遇偏  
風馮氏驕縱受納狼藉為御史所劾與陵俱召詣付廷  
尉諸囚多姦焉獄中致競尋別詔斬馮於都市支解為  
九段陵以疾卒於獄中陵歷覽羣書兼有詞藻自魏中  
興之後迄於孝武帝詞誥表檄多陵所為然率性豪侈  
溺於財色諸弟之間不能盡雍穆之美世論以此譏之  
陵素與魏收不協後收既專典國史陵恐被惡言乃悅

之曰昔有班固今則魏子收縮鼻笑之憾不釋悽子贍  
字彥通聰明彊學有文情潔白善容止神采嶷然言不  
妄發才學風流為後來之秀初潁川荀濟自江南入洛  
贍學於濟故得經史有師法侍中李神儁雅有風譽晚  
年無子見贍歎謂邢邵曰昨見崔陵兒便為後生第一  
我遂無此物見此使人傷懷年十五刺史高昂召署主  
簿清河公高岳辟為開府西閣祭酒博陵崔暹為中尉  
啓除侍御史以父與暹隙俄而去官神武召與北海王

晞為諸子賓友仍為相府中兵參軍轉主簿文襄崩祕  
未發喪文宣命瞻兼相府司馬使鄴魏孝靜帝以人日  
登雲龍門與其父悰俱侍宴又敕瞻令近御坐亦有應  
詔詩詔問邢邵等曰今瞻此詩何如其父咸云悰博雅  
洪麗瞻氣調清新並詩人之冠冕譙罷咸共嗟賞之云  
今日之譙併為崔瞻父子楊悰欲引瞻為中書侍郎時  
盧思道直中書省悰因問思道曰我比日多務都不見  
崔瞻文藻卿與其親通理當相悉思道曰瞻文思之美



實有可稱但舉世重其風流所以才華見沒惜云此言  
有理其日便奏用之惜又曰昔裴瓚晉世為中書郎神  
情高邁每於禁門出入宿衛者皆肅然動容崔生堂堂  
之貌亦當無媿裴子乎皇建元年除給事黃門侍郎與  
趙郡李概為莫逆之友概將東還贍遺之書曰仗氣使  
酒我之常弊詆訶指切在卿尤甚足下告歸吾於何聞  
過也贍患氣兼性遲重雖居二省多不堪敷奏除清河  
邑中正孝昭踐阼太子就傳受業詔除太子中庶子徵

赴晉陽敕曰東宮弱年未陶訓義卿儀形風德人之師  
表故勞卿朝夕游處開發幼蒙一物三善皆以相寄贍  
專在東宮調護講讀及進退禮度儀制一皆委焉太子  
納妃斛律氏敕贍與鴻臚卿崔劼撰定婚禮儀注仍面  
授別旨曰雖舊事恐未盡善可好定此儀以為後式時  
詔議三恪之禮太子少傅魏收為一議朝士莫不雷同  
贍別立異議收讀訖笑而不言贍正色曰聖上詔羣臣  
議國家大典少傅名位不輕贍議若是須贊其所長若

非須詰其不允何容讀國士議文直此冷笑崔瞻居聖  
朝顯職尚不免此疵草萊諸生欲云何自進瞻容貌方  
嚴詞旨雄辯收慙遽竟無一言太寧元年除衛尉少卿  
尋兼散騎常侍聘陳使主行過彭城讀道旁碑文未畢  
而絕倒從者遙見以為中惡此碑乃瞻父徐州時所立  
故哀感焉瞻經熱病面多癥痕然雍容可觀辭韻溫雅  
南人大相欽服陳舍人劉師知見而心醉乃言常侍前  
朝通好之日何意不來今日誰相對揚者其見重如此

還襲爵武成公再遷吏部郎中因患耳請急十餘日不  
瘥舊式百日不上解官吏部尚書尉瑾性褊急以瞻舉  
措舒緩曹務繁劇附驛奏聞因見代免歸鄉里天統末  
加驍騎大將軍就拜銀青光祿大夫卒贈大理卿濟州  
刺史諡曰文瞻性簡傲以才地自矜所與周旋皆一時  
名望在御史臺常於宅中送食備珍羞別室獨餐處之  
自若有一河東人士姓裴亦為御史伺瞻食便往造焉  
瞻不交言又不命匕筯裴坐觀瞻食罷而退明日裴自

攜七觴恣情飲噉膳方謂裴云我初不喚君食亦不其  
君語遂能不顧小節昔劉毅在京口冒食鵝炙豈異於  
是乎君定名士於是每與之同食性方重好讀書酒後  
清言聞者莫不傾耳自天保以後重吏事謂容止醞藉  
者為潦倒而瞻終不改焉嘗見選曹以劉逖為縣令謂  
之曰官長止應子琮輩乃復屈名人馮子琮聞之大怒  
及其用事幾敗焉有集二十卷陵弟仲文有文學太和  
中為丞相掾沙苑之敗仲文持馬尾渡河波中乍没乍

出神武望見曰崔掾也遽遣船赴接及至謂曰卿為君  
為親不顧萬死可謂家之孝子國之忠臣也後文襄欲  
使行青州聞其多醉乃止天保初倭為侍中仲文為銀  
青光祿大夫同日受拜時云兩鳳連飛嘗被敕召宿醒  
未解文宣怒將罰之試使為觀射詩十韻操筆立成乃  
原之拜散騎常侍光祿大夫卒子偃太子洗馬尚書郎  
偃弟儵有文藻列在文苑傳中仲文弟叔仁輕俠重衿  
期仕魏為潁川刺史以貪污為御史中丞高仲密劾賜

死於宅臨刑賦詩五絕與諸弟訣別不及其弟陵以具  
不甚營救也子彥武有識用隋開皇中位魏州刺史叔  
仁弟叔義魏孝莊時為尚書庫部郎初叔義父休為青  
州刺史放盜魁令出其黨遂以為門客在洛陽與兄叔  
仁鑄錢事發合家逃逸叔義見執時城陽王徽為司州  
牧臨淮王彧以非其身罪驟為致言徽以求婚不得遂  
停赦書而殺之叔義弟子侃以寄名從軍竊級為中書  
郎為尚書左丞和子岳彈糾失官性兼使氣後自修改

閉門讀書當時稱為博洽後兼通直散騎常侍使梁為  
陽斐副恥居斐下自負才地呼斐為陽子語輒折之還  
卒於路子拯位太子僕武德郡守子侃弟子植位冀州  
別駕走馬從禽髮挂木而死子珪子植弟子聿位東莞  
太守子聿弟子約五歲喪父不肯食肉後喪母居喪哀  
毀骨立人云崔九作孝風吹即倒禪月兄子度死又百  
日不入房長八尺餘姿神雋異潛觀梁使劉孝儀賓從  
見者駭目武定中為平原公開府祭酒與兄子瞻俱詣



晉陽寄居佛寺贍長於子約二歲每退朝久立子約馮  
几對之儀望俱華儼然相映諸沙門竊窺之以為二天  
人也乾明中為考功郎病且卒謂贍曰自諸兄歿而門  
業頽替居家大唯吾與爾命之脩短曾何足悲汝能免  
之吾不餒矣

孫騰字龍雀咸陽石安人也祖通仕沮渠氏為中書舍  
人沮渠氏滅因徙居北邊及騰貴魏朝贈司徒父機贈  
太尉騰少質直明解吏事魏正光中北方擾亂歸爾朱

榮尋為神武都督長史神武為晉州又引為長史封石  
安縣伯及起兵於信都騰以誠款預謀策累遷郡公入  
為侍中尋兼尚書左僕射時魏京兆王愉女平原公主  
寡騰願尚之而公主欲侍中封隆之騰妬隆之遂相間  
構神武啓免騰官俄而復之與斛斯椿俱掌機密見忌  
慮禍奔晉陽神武入討椿留騰行并州事入為尚書左  
僕射內外之事騰咸知之兼司空除侍中兼尚書令時  
西魏攻南兗州詔騰率諸將討之騰性怯無威略失利

而還又除司徒餘官如故初北境亂騰亡一女及貴推訪不得疑其為人婢及為司徒奴婢訴良者皆免之願免千人冀得其女神武知之大怒解司徒尋為尚書左僕射太保仍侍中遷太傅初博陵崔孝芬取貧家子賈氏為養女孝芬死其妻更適鄭伯獻攜賈於鄭氏賈有色騰納之為妾其妻袁死騰以賈有子正以為妻詔封丹陽郡君復請以袁氏爵回授其妾其違禮肆情多此類也騰早依神武神武深信待之置於魏朝寄以心腹

遂志氣驕盈與奪自己納賄不知紀極官贈非財不行  
餉藏銀器盜為家物親狎小人專為聚歛與高岳高隆  
之司馬子如號四貴非法專恣騰為甚焉神武文襄屢  
加誚讓終不悛改朝野深非笑之武定六年薨贈太師  
開府錄尚書事諡曰文天保初以騰佐命詔祭告其墓  
皇建中配享神武廟庭子鳳珍嗣性庸暗卒於儀同三  
司

高隆之字延興洛陽人也為閹人徐成養子少時以貨

升為事父幹魏白水郡太守或云幹為姑壻高氏所養  
因從其氏隆之後有參定之功神武命為弟仍云勃海  
脩人幹贈司徒公隆之身長八尺美鬚髯深沈有志氣  
初行臺于暉引為郎中與神武深相結託及神武起義  
山東以隆之為大行臺御史右丞從破四胡除驃騎大  
將軍封平涼公累遷并州刺史後拜尚書右僕射時初  
給民田貴勢皆占良美貧弱咸受瘠薄隆之啓神武悉  
更反易乃得均平及領營構大將以十萬夫徹洛陽宮

殿運於鄴營構之制皆委隆之增築南城周二十五里以漳水近於帝城起長隄以防汎溢之患又鑿渠引漳水周流城郭造水碾磴並有利於時魏自孝昌以後天下多難刺史太守皆為當部都督雖無兵事皆立佐僚所在頗為煩擾隆之請非實在邊要掌兵馬者悉斷之又朝貴多假常侍以取貂蟬之飾隆之自表解侍中并陳諸假侍中服者請亦罷之詔皆如表自軍國多事冒名竊官者不可勝數隆之奏請檢括旬日獲五萬餘人

而羣小囂然隆之懼而止詔監起居事進位司徒武定  
中除尚書令遷太保文襄作宰風俗肅清隆之時有受  
納文襄於尚書省大加責讓齊受禪進爵為王尋以本  
官錄尚書事領大宗正卿監國史隆之性好小巧至於  
公家羽儀百戲服制時有改易不循典故時論非之於  
射棚上立三人像為壯勇之勢文宣曾至東山因射謂  
隆之曰棚上可作猛獸以存古義何為終日射人隆之  
無以對初文襄委任兼僕射崔暹黃門侍郎崔季舒等

及文襄崩隆之啓文宣並欲害之不許文宣以隆之舊齒委以政事隆之子姪於楊遵彥前妻帝妹也故遵彥讒毀日至崔季舒等仍以前隙譖云隆之每見詞訟者輒加哀矜之意以示非已能裁文宣以其受任既久知有冤狀便宜申滌何過要名非大臣義天保五年禁止尚書省隆之曾與元昶宴語昶曰與王交游當死生不相背人有密言之者又帝未登庸之日隆之意嘗侮帝帝將受魏禪大臣咸言未可隆之又在其中帝深銜之



因此怒罵曰徐家老公令壯士築百餘拳放出渴將飲水人止之隆之曰今日何在遂飲之因從駕死於路中贈太尉太保陽夏王竟不得諡隆之雖不學涉而欽尚文雅搢紳名流必存禮接寡姊為尼事之如母訓督諸子必先文義世以此稱之文宣末年既多猜害追忿隆之執其子司徒中兵慧登等二十餘人於前慧登等言乞命帝曰不得已命左右一時梟首並投之漳水發隆之冢出其屍葬已積年貌猶不改斬截骸骨而焚之棄

於漳流天下寃之隆之嗣遂絕乾明中詔其兄子子遠  
為隆之後襲爵陽夏王還其財產隆之初見信於神武  
性多陰毒睚眦之忿無不報焉儀同三司崔孝芬以結  
婚姻不果太府卿任集同知營構頗相乖異瀛州刺史  
元晏請託不遂並構成其罪誅害之終至家門殄滅論  
者謂有報應焉

司馬子如字遵業自云河內溫人也八世祖模晉司空  
南陽王模世子保晉亂出奔涼州因家焉魏平姑臧徙

居於雲中父興龍魏魯陽太守子如少機警有口辯好  
交游豪桀初為懷朔鎮省事與神武相結託分義甚深  
孝昌中北州淪陷子如攜家口南奔肆州為爾朱榮所  
禮遇榮之向洛陽也以子如為司馬仍為大行臺郎榮  
以子如明辨能說時事數遣奉使詣闕多稱旨孝莊亦  
接待焉為武衛將軍榮之誅也子如知有變自宮內突  
出至榮宅棄家隨榮妻子與爾朱世隆等走出京城世  
隆便欲還北子如曰事貴應機兵不厭詐天下充充唯

彊是視於此際會不可以弱示人若必走北即恐變故  
隨起不如分兵守河橋廻軍向京出其不意假不如心  
猶足示有餘力於是世隆還通京城節閔帝立以為侍  
中驃騎大將軍進封陽平郡公神武起義信都世隆知  
子如與神武有舊疑之出為南岐州刺史神武入洛陽  
子如赴京師以為大行臺尚書朝夕左右參知軍國天  
平初除尚書左僕射開府與侍中高岳侍中孫騰右僕  
射高隆之等共知朝政號為四貴甚見信重神武鎮晉

陽子如時往謁見待之甚厚並坐同食從旦達暮及當還神武與婁后俱有賚遺率以為常子如性既豪爽兼恃恩舊簿領之務與奪任情公然受納無所顧憚興和中以為北道行臺巡檢諸州守令已下委其黜陟子如至定州斬深澤令至冀州斬東光令皆以稽留時漏致之極刑有進退少不合旨者便令武士頓曳白刃臨頸士庶惶懼不知所為轉尚書令子如於建義之始身不參預直以神武故舊遂當委重意氣既高聚斂不息時

文襄入輔朝政子如以贓賄為御史中尉崔暹所劾禁  
止於尚書省一宿而髮皆白辭曰司馬子如本從夏州  
策一杖投相王王給露車一乘輦犢犢在道死唯  
輦角存此外皆人上取得神武書敕文襄曰司馬令是  
吾故舊汝宜寬之文襄駐馬行街以出子如脫其鎖子  
如懼曰非作事邪於是除削官爵神武後見之哀其憔悴  
以滕承其首親為擇蝨賜酒五百餅羊五百口粳米  
五百石子如曰無事尚被囚幾死若受此豈有生路邪

未幾起行冀州事子如能自改厲甚有聲譽詔復官爵  
別封野王縣男齊受禪以有翼贊之功別封須昌縣公  
除司空子如性滑稽不事檢裁言戲穢褻識者非之而  
事姊有禮撫諸兄子慈篤當時名士並加欽愛世復以  
此稱之然素無鯁正不能以平道處物文襄崩暹等赴  
晉陽子如以糾劾之釁乃啓文宣言其罪惡仍勸帝誅  
之其後子如以馬度關為有司所奏文宣引子如讓之  
曰崔暹季舒事朕先世有何大罪卿令我殺之因此免

官久之猶以先帝之舊拜太尉以疾薨贈太師太尉懷  
州刺史諡曰文明長子消難尚神武女文宣世為北豫  
州刺史叛入周列在周史子如兄纂纂長子世雲輕險  
無行累遷潁州刺史肆行姦穢將見推懼遂從侯景文  
襄猶以子如恩舊免其諸弟死罪徙北邊世雲以侯景  
敗於渦陽復有異志為景所殺世雲弟膺之字仲慶美  
鬚髯有風貌好學厚自封植神氣甚高歷中書黃門侍  
郎天平中子如執鈞當軸膺之既宰相猶子兼又自有



名望其所與游集盡一時名流與邢子才王元景等並  
為莫逆之交及世雲陷於逆亂期親皆應誅膺之及諸  
弟並有人才為朝廷所惜文襄特減死徙近鎮文宣嗣  
業得還齊受禪子如以別封須昌縣公迴授膺之子如  
撫愛甚慈膺之昆弟事之如父性方古不會俗舊與楊  
惲同為黃門郎至惲為尚書令抗禮如初惲嘗有從姊  
慘尚書卿尹皆跪弔膺之執手而出曾路逢惲威儀道  
引乃於樹下側避之惲於車望見令呼謂曰兄何故避

弟膺之曰我自避赤棒本不避卿惜甚重之然以其疎  
簡傲物竟天保間淪滯不齒乾明中除衛尉少卿遷國  
子祭酒河清末拜金紫光祿大夫患泄痢積年不起武  
平中就家拜儀同三司班台之貴近世專以賞勲勤膺  
之雖為猥雜而名器猶重初司徒趙彥深起自孤微為  
子如管記膺之甚相忽略不為之禮及彥深為宰相朝  
士輻湊膺之自念故被延請永不至門每與相見捧袂  
而已太常卿段孝言左丞相孝先之弟也位望甚隆嘗

詣其弟幼之舉座傾敬膺之時牽疾在外齋馮几而坐  
不為動容直言我患痢久太常不得致怪黃門郎陸杳  
貴游後進膺之嘗與杳杳忽後至寒溫而已杳遂輟園  
宅閑素門無雜客性不飲酒而不愛重賓遊病久不復  
堪讀書或以弈碁永日名士有素懷者時相尋候無雜  
言唯論經史好讀太玄經又注揚雄蜀都賦每云我與  
揚子雲周旋患痢十七年竟不愈亡歲以痢疾終膺之  
弟子瑞為御史中丞正色舉察為朝廷所憚以疾去職

就拜祠部尚書卒贈儀同三司瀛州刺史諡曰文節子  
瑞妻陸令萱妹及令萱得寵於後主重贈子瑞開府儀  
同三司中書監溫縣伯諸子亦並居顯職同遊給事黃  
門侍郎同回太常少卿同憲通直常侍同遊終為佳吏  
隋開皇中為尚書戶部侍郎卒於遂州刺史子瑞弟幼  
之清貞有行武平末為大理卿開皇中卒於眉州刺史  
薛琬字曇珍代人也父彪子魏徐州刺史自有傳琬形  
貌瓌偉以有幹用為典客令每引見時儀望甚美宣武

帝謂曰卿風度峻整姿貌秀異後當升進何以處官琬  
答曰宗廟之禮不敢不謹朝廷之事不敢不忠自此以  
外非庸臣所及正光中行洛陽令部內肅然有犯法者  
未加考掠直以辭理窮覈多得其情於是豪猾畏威事  
務簡靜時以久旱京師見囚悉召集華林理問冤滯洛  
陽繫獄唯有三人孝明嘉之賜縑百匹琬本附於元乂  
乂廢憂懼由是政教廢弛坐免官李神軌有寵於靈太  
后琬復事之累遷吏部郎中先是吏部尚書崔亮奏立

停年之格不簡人才專問勞舊琬乃上書曰臣聞錦穀雖輕不委之以學割瑚璉任重豈寄之以弱力若使選曹唯取年勞不簡賢否使義均行鴈次若貫魚勘簿呼名一吏足矣數人而用何謂銓衡今黎元之命繫於守長若得其人則蘇息有地任非其器為患更深臣請郡縣之職吏部先盡擇才并學通今古曉達政職者以應其選不拘入職遠近年勲多少其積勞之中有才堪牧民者自在先用之限其餘不堪者既壯藉其力豈容老

而棄之將佐丞尉去民稍遠小小當否未為多失宜依次補敘以酬其勞書奏不報後因引見復陳曰君相共治天下本屬百官是以漢朝常令三公大臣舉賢良方正有道直言之士以為長吏監撫黎元自晉末以來此風遂替今四方初定務在養民臣請依漢氏更立四科令三公宰貴各薦時賢以補郡縣明立條格防其阿黨之端庶令塗炭之餘戴仰有地詔下公卿議之事亦寢元天穆討邢杲以琬為行臺尚書軍次東郡時元顥已

據鄧城邢杲又逼歷下天穆議其所先衆議以杲彊盛  
宜先經略唯琣以為邢杲聚衆無名雖彊猶賊元顥皇  
室昵親來稱義舉自河陰之役人情駭怨今有際會易  
生感動杲鼠竊狗偷非有遠志宜先討顥待顥事決然  
後迴師滅杲不難天穆以羣情所願遂先討杲杲降軍  
還至定陶天穆留琣行西兗州事尋為元顥所陷顥執  
琣自隨爾朱榮破顥天穆謂琣曰不用君言乃至於此  
天平初拜七兵尚書神武引為丞相長史軍國之事多



所關知珣亦推誠盡節屢進忠讜神武大舉西伐將度  
蒲津珣諫曰西賊連年饑饉故冒死來入陝州欲取倉  
粟今高司徒已圍陝城粟不得出但宜置兵諸道勿與  
野戰比及來年麥秋人民盡應餓死寶炬黑獺自然歸  
降願王無渡河也侯景亦曰今者之舉兵衆極大萬一  
不捷卒難收殿不如分為二軍相繼而進前軍若勝後  
軍合力前軍若敗後軍承之神武皆不納遂有沙苑之  
敗後范陽盧仲禮反珣與諸軍討平之轉殷州刺史為

政嚴酷吏民苦之後歷度支殿中二尚書天保元年遷  
尚書右僕射卒臨終敕其子斂以時服踰月便葬不聽  
干求贈官自製喪車不加雕飾但用麻為流蘇繩網絡  
而已明器等物並不令置琬久在省闥明閑簿領當官  
剖斷敏速如流然天性險忌情義不篤外似方格內實  
浮動受納貨賄曲理舞法深文刻薄多所傷害人士畏  
惡之魏東平王元匡妾張氏淫逸放恣琬初與姦通後  
納以為婦或有謗之遂棄其前妻于氏不認其子允由

是室家內忿競相告列深為世論所譏鄙贈開府儀同  
三司尚書左僕射青州刺史諡曰威恭子允嗣

楊愔字遵彥弘農華陰人父津魏司空前史有傳愔小  
名秦王兒童時口若不能言而風度深敏出入門閭未  
嘗戲弄六歲學史書十一受詩易好左氏春秋幼而喪  
母曾詣舅源子恭子恭與之飲問曰汝比來讀何書答  
曰誦詩子恭因曰誦詩至渭陽未邪愔便號泣感噎子  
恭亦對之歔歔遂為之罷酒子恭後謂津曰嘗謂秦王

兒不甚察慧從今已後更刮目而視之惜一門四世同居家甚隆盛昆季就學者三十餘人學庭前有柰樹其實落地羣兒咸爭之惜頽然獨坐其季父暉適入學館見之大用嗟異顧謂賓客曰此兒恬裕有我家風宅內有茂竹遂為惜於林邊別葺一室命獨處其中常銅盤具盛饌以飯之因以督厲諸子曰汝輩但如遵彥謹慎自得竹林別室銅盤重肉之食從父兄黃門侍郎昱特相器重曾謂人曰此兒駒齒未落已是我家龍文更十

歲後當求之千里外。昱嘗與十餘人賦詩。情一覽便誦。無所遺失。及長。能清言。美音。制風神。俊悟。容止可觀。人  
士見之。莫不敬異。有識者多以遠大許之。正光中。隨父  
之并州。性既恬默。又好山水。遂入晉陽西縣。甕山讀書。  
孝昌初。津為定州刺史。愔亦隨父之職。以軍功除羽林  
監。賜爵魏昌男。不拜。及中山為杜洛周陷。全家被囚。繫  
未幾。洛周滅。又沒葛榮。榮欲以女妻之。又逼以偽職。愔  
乃託疾。密含牛血數合於衆中。吐之。仍陽喑不語。榮以

為信然乃止永安初還洛拜通直散騎侍郎年十八元  
顥入洛時愔從父兄侃為北中郎將鎮河梁愔適至侃  
處便屬乘輿失守夜至河侃雖奉迎車駕北度而潛南  
奔愔固諫止之遂相與扈從達建州除通直散騎常侍  
愔以世故未夷志在潛退乃謝病與友人中書侍郎河  
間邢邵隱於嵩山及莊帝誅爾朱榮其從兄侃參贊帷  
幄朝廷以其父津為并州刺史北道太行臺愔隨之任  
有邯鄲人楊寬者求義從出藩愔請津納之俄而孝莊

幽崩愔家以忠烈闔門塗炭愔時適還都行達邯鄲過  
楊寬家為寬所執至相州見刺史劉誕誕以愔名家盛  
德甚相哀念付長史慕容白澤禁止焉遣隊主輩榮貴  
防禁送都至安陽亭愔謂榮貴曰僕家世忠臣輸誠魏  
室家亡國破一至於此雖曰囚虜何復面目見君父之  
讎得自縊於一繩傳首而去是君之惠也榮貴深相矜  
感遂與愔俱逃愔乃投高昂兄弟既潛竄累載屬神武  
起義至信都遂投刺轅門便蒙引見贊揚興運陳訴家

禍言辭哀壯涕泗橫集神武為之改容即以為行臺郎  
中大軍南攻鄴歷楊寬村寬於馬前叩頭請罪愴謂曰  
人不識恩義蓋亦常理我不恨卿無假驚怖時鄴未下  
神武命愴作祭天文燎畢而城陷由是轉大行臺右丞  
于時霸圖草創軍國務廣文檄教令皆自愴及崔陵出  
愴遭罹家難嘗以喪禮自居所食唯鹽米而已哀毀骨  
立神武愴之常相開慰及韓陵之戰愴每陷陣先登朋  
僚咸共怪歎曰楊氏儒生今遂為武士仁者必勇定非



虛論項之表請解職還葬一門之內贈太師太傅丞相  
大將軍者二人太尉錄尚書及尚書令者三人左僕射  
尚書五人刺史太守者二十餘人追榮之盛古今未之  
有也及喪柩進發吉凶儀衛亘二十餘里會葬者將萬  
人是日隆冬盛寒風雪嚴厚悵徒跣號哭見者無不哀  
之尋徵赴晉陽仍居本職悵從兄稚為岐州刺史以直  
言忤旨見誅悵悲懼疾發乃取急就鴈門溫湯療治郭  
秀害其能因致書恐之曰高王欲送卿於帝所仍勸其

逃亡惛遂棄衣冠於水濱若自沈者變易姓名自稱劉士安入嵩高山與沙門曇謨徵等屏居削迹又潛之光州因東入田橫島以講誦為業海隅之士謂之劉先生太守王元景陰祐之神武知惛猶在遣惛從兄寶猗齎書慰喻仍敕光州刺史奚思業令搜訪以禮發遣神武見之大悅除太原公開府司馬轉長史太原公即文宣帝也復授大行臺右丞封華陰縣侯遷給事黃門侍郎妻以庶女又兼散騎常侍為聘梁使主行達碣州內

有惜家舊佛寺入精廬禮拜見太傅容像感悲慟哭歐  
血數升遂發病不成行輿疾還鄴久之以本官兼尚書  
吏部郎中武定末以望實之美超拜吏部尚書加侍中  
衛將軍侍學典選如故天保初以本官領太尉少傅別  
封陽夏縣男又詔監太史遷尚書右僕射尚太原長公  
主即魏孝靜后也會有雉集其舍又拜開府儀同三司  
尚書右僕射改封華山郡公九年徙尚書令又拜特進  
驃騎大將軍十年封開封王文宣之崩百寮莫有下淚

惛悲不自勝濟南嗣業任遇彌隆朝章國命一人而已  
推誠體道時無異議乾明元年為孝昭所誅時年五十  
天統末追贈司空惛貴公子早有聲譽風表鑒裁為朝  
野所稱家門遇禍唯有二弟一妹及兄孫女數人撫養  
孤幼慈旨溫顏咸出仁厚重分義輕貨財前後賜與多  
散之親族羣從弟姪十數人並待而舉火頻遭迭厄冒  
履危難一餐之惠酬答必重性命之讎捨而不問典選  
二十餘年獎擢人倫以為已任然取士多以言貌時致

謗言以為惜之用人似貧士市瓜取其大者惜聞不以  
為意其聰記彊識半面不忘每有所召或單稱姓名無  
有誤者後有選人魯漫漢自言猥賤獨不見識惜曰卿  
前在元亨思坊騎秃尾草驢見我不下以方麴障面我  
何不識卿漫漢驚服又調之曰名以定禮漫漢果自不  
虛又令吏唱人名誤以盧士深為士琛士深自言惜曰  
盧郎潤朗所以比玉自尚公主後衣紫羅袍金縷大帶  
遇李庶頗以為恥謂曰我此衣服都是內裁既見子將

不能無愧及居端揆經綜機衡千端萬緒神無滯用自

天保五年已後一人喪德維持匡救實有賴焉每天子

臨軒公卿拜授發號施令宣揚詔冊悃辭氣溫辯神儀

秀發百僚觀聽莫不悚動自居大位門絕私交輕貨財

重仁義前後賞賜積累巨萬散之九族架篋之中唯有

書數千卷太保平原王隆之與悋鄰宅嘗見其門外有

富胡數人謂左右曰我門前幸無此物性周密畏慎恒

若不足每聞後命愀然變色文宣大漸以恒山長廣二

王位地親逼深以後事為念惜與左僕射平秦王歸彥  
侍中燕子獻黃門侍郎宋欽道領軍可朱渾天和中書  
侍郎鄭子默受遺詔輔政並以二王威望先重咸有猜  
忌之心初在晉陽以大行在殯天子諒闇議令恒山王  
在東館欲奏之事皆先諮決二旬而止仍欲以恒山隨  
梓宮之鄴留長廣鎮晉陽執政復生疑貳兩王又俱從  
至于鄴子獻立計欲處太皇太后於北宮歸政皇太后  
又自天保八年以來爵賞多濫至是惜先自表解其開

封王諸叨竊冒榮者皆從黜免由是嬖寵失職之徒盡  
歸心二叔高歸彥初雖同德後尋反動以疎忌之跡盡  
告兩王可朱渾天和又每云若不誅二王少主無自安  
之理宋欽道面奏帝稱二叔威權既重宜速去之帝不  
許曰可與令公共詳其事情等議欲出二王為刺史以  
帝仁慈恐不可所奏乃通啓皇太后具述安危有宮人  
李昌儀者北豫州刺史高仲密之妻坐仲密事入宮太  
后與昌儀宗情甚相昵愛太后以啓示之昌儀密白太



皇太后愔等又議不可令二王俱出且出其一乃奏以  
長廣王為大司馬并州刺史恒山王為太師錄尚書事  
及二王拜職於尚書省大會百僚愔等並將同赴子默  
止之云事不可量不可輕脫愔云吾等至誠體國豈有  
恒山拜職有不赴之理何為忽有此慮長廣旦伏家僮  
數十人於錄尚書後室仍與席上諸貴數人相知并與  
諸勲胄約行酒至愔等我各勸雙盃彼必致辭我一曰  
捉酒二曰捉酒三曰何不捉爾輩即捉及宴如之愔大

言曰諸王反逆欲殺忠貞邪尊天子削諸侯赤心奉國  
未應及此恒山王欲緩之長廣王曰不可於是愔及天  
和欽道皆被拳杖亂毆擊頭面血流各十人持之使薛  
孤延康買執子默於尚藥局子默曰不用智者言以至  
於此豈非命也二叔率高歸彥賀拔仁斛律金擁愔等  
唐突入雲龍門見都督叱利騷招之不進使騎殺之開  
府成休寧拒門歸彥喻之乃得入送愔等於御前長廣  
王及歸彥在朱華門外太皇太后臨昭陽殿太后及帝

側立恒山王以墀叩頭進而言曰臣與陛下骨肉相連  
楊遵彥等欲擅朝權威福自己自王公以還皆重足屏  
氣共相唇齒以成亂階若不早圖必為宗社之害臣與  
湛等為國事重賀拔仁斛律金等惜獻皇帝業共執遵  
彥等領入宮未敢刑戮專輒之失罪合萬死帝時默然  
領軍劉桃枝之徒陞衛叩刀仰視帝不睨之太皇太后  
令却杖不肯又厲聲曰奴輩即今頭落乃却因問楊郎  
何在賀拔仁曰一目已出太皇太后愴然曰楊郎何所

能留使不好邪乃讓帝曰此等懷逆欲殺我二兒次及  
我奈何縱之帝猶不能言太皇太后怒且悲王公皆泣  
太皇太后曰豈可使我母子受漢老嫗斟酌太后拜謝  
恒山王叩頭不止太皇太后謂帝曰何不安慰汝叔帝  
曰天子亦不能與叔惜豈能惜此漢輩但願乞兒性命  
兒自下殿去此等任叔父處分遂皆斬之長廣王以子  
默昔讒已作詔書故先拔其舌截其手太皇太后臨愴  
喪哭曰楊郎忠而獲罪以御金為之一眼親納之曰以

表我意恒山王亦悔殺之先是童謠曰白羊頭髦禿殺  
獬頭生角又曰羊羊喫野草不喫野草遠我道不遠打  
爾腦又曰阿麼姑禍也道人姑夫死也羊為憎也角文  
為用力道人謂廢帝小名太原公主嘗作尼故曰阿麼  
姑憎子獻天和皆尚帝姑故曰道人姑夫云於是乃以  
天子之命下詔罪之罪止一身家口不問尋復簿錄五  
家王晞固諫乃各沒一房孩幼盡死兄弟皆除名遵彥  
死仍以中書令趙彥深代總機務鴻臚少卿陽休之私

謂人曰將涉千里殺騏驎而策蹇驢可悲之甚惜所著詩賦表奏書論甚多後散失門生鳩聚所得萬餘言燕子獻字季則廣漢下洛人少時相者謂曰使役在朝大富貴在齊趙後遇周文於關中創業用為典籤將命使蠕蠕子獻欲驗相者之言來歸神武神武見之大悅神武舊養韓長之姑為女是為陽翟公主遂以嫁之甚被待遇文宣時官至侍中濟南即位委任彌重除尚書右僕射子獻素多力頭少髮當狼狽之際排衆走出省門

斛律光逐而禽之子獻歎曰丈夫為計遲遂至此天統  
五年追贈司空天和事見兄元傳鄭頤字子默彭城人  
高祖據魏彭城太守自滎陽徙焉頤聰敏頗涉文義而  
邪險不良初為太原公東閣祭酒天保世稍遷中書侍  
郎與宋欽道特相友愛欽道每師事之楊愔始輕宋鄭  
不為之禮俄而自結人主稍不可制欽道舊與濟南欸  
狎共相引致無所不言乾明初拜散騎常侍兼中書侍  
郎二人權將與愔相埒愔見害之時邢子才流涕曰楊

令君雖善人死日恨不得一佳伴頤後與惓同詔追贈  
殿中尚書廣州刺史頤弟抗字子信頗有文學武平末  
兼左右郎中待詔文林館

陽休之字子烈右北平無終人父固魏前將軍休之儁  
爽有風概少勤學愛文藻弱冠擅聲為後來之秀時人  
為之語曰能賦能詩陽休之初為州主簿孝昌中杜洛  
周陷薊城休之與宗室南奔章武轉至青州葛榮寇亂  
河北流人多湊青州休之知將有變請其族叔伯彥等



潛歸京師避之多不能從休之垂涕別去俄而葛榮邢  
杲作亂伯彥等咸為土人所殺諸陽死者數十人唯休  
之兄弟免魏莊帝立累遷太尉記室參軍李神儁監起  
居注啓休之與河東裴伯茂范陽盧元明河間邢子才  
俱入撰次後與魏收李同軌等脩國史後行臺賀拔勝  
經略樊沔請為南道軍司俄而魏孝武帝入關勝令休  
之奉表詣長安參謁時神武亦啓除休之太常少卿尋  
屬勝南奔仍隨勝至江南休之聞神武推奉靜帝乃白

勝啓梁武求還文襄以為大行臺郎中天保中神武幸汾陽之天池池邊得一石上有隱起字其文曰六王三川神武以問休之曰此文字何義對曰六者是大王之字王當有天下此乃大王符瑞受命之祥既於天池得此石可謂天意命王也吉不可言神武又問三川何義休之曰河洛伊為三川此洛陽也而涇渭洛亦為三川此雍州也大王若受天命終應統於關右神武曰世人無事嘗道我欲反今若聞此更致紛紜慎莫妄言也元

象初錄荊州軍功封新泰縣伯武定二年除中書侍郎  
先是中書專掌綸誥魏宣武以來事移門下至是發詔  
依舊任遇甚顯時魏收為散騎常侍兼侍郎與休之參  
掌詔命世論以為中興時有人士戲嘲休之云有觸藩  
之羝羊乘連錢之驄馬從晉陽而向鄴懷屬書而盈把  
左丞盧斐以其文書請謁啓神武禁止曾赦不問歷尚  
食典御太子中庶子給事黃門侍郎中軍將軍幽州大  
中正兼侍中持節奉璽書詣并州敦喻文宣為相國齊

王時將受魏禪發晉陽至平陽郡為人心未一旦還并  
州恐漏泄仍斷行人休之性疎放使還遂說其事鄴中  
悉知之高德正以聞文宣忿之而未發及受禪除散騎  
將軍積其前事也文宣郊天百寮咸從休之衣兩襠甲  
手持白梃時魏收為中書令嘲之曰義真服未休之曰  
我昔為常伯首戴蟬冕今處驍游身被衫甲允文允武  
何必減卿談笑晏然議者服其夷曠以禪讓之際參定  
禮儀別封始平縣男後除中山太守先是韋道建宋欽

道代為定州長史帶中山太守並立制監臨之官出行不得過百姓飲食有者即數錢酬之休之常以為非及至郡復相因循或問其故休之曰吾昔非之者為其失仁義今日行之者自欲避嫌疑豈是夙心直是處世難耳在郡三年再致甘露之瑞文宣崩徵休之至晉陽經紀喪禮與魏收俱至尚書令楊遵彥與休之等款狎相遇中書省言及喪事收掩淚收聲休之嘖眉而已他日遵彥謂曰昨聞諱魏少傅悲不自勝卿何容都不流涕

休之曰天保之世魏侯時遇甚深鄙夫以衆人見待佞  
哀詐泣實非本懷皇建初兼度支尚書孝昭留心政道  
每訪以治術休之啟以明賞罰慎官方禁滛侈恤民患  
為政教之先帝深納之大寧中歷都官七兵祠部三尚  
書河清三年出為西兗州刺史天統初徵為光祿卿監  
國史尋除吏部尚書休之多識故事諳悉氏族凡所遷  
用莫不才地俱允前國史助教熊安生當時碩儒因喪  
解職久不見調休之引為國子博士儒者以此歸之性

簡率不樂煩職每謂人曰此官實自清華但煩劇妨吾  
賞適真是樊籠矣武成崩後頻乞就閑武平初除中書  
監尚書右僕射三年加位特進與朝士撰聖壽堂御覽  
六年正除尚書左僕射領中書監休之早得才名為人  
物所傾服外如疎放內實謹厚少年頗以峻急為累晚  
節以通美見稱重衿期好游賞太常卿盧元明人地華  
重罕所交接非一時名士不得與之游休之始為行臺  
郎便坦然投分文酒會同相得甚款鄉曲人士莫不企

羨焉太子中庶子平原明少遐風流名士也梁亡奔鄴  
昔因通聘與休之同游及少遐卒其妻窮敝休之經紀  
振恤恩分甚厚尚書僕射崔暹為文襄所親任勢傾朝  
列休之未嘗請謁暹子達拏幼而聰敏年十餘已作五  
言詩梁國通和聘使在館暹持達拏數首詩示諸朝士  
有才學者又欲示梁客餘人畏暹皆隨宜應對休之獨  
正言郎子聰明方成偉器但小兒文藻恐未可以示遠  
人其方直如此元景每云當今直諫陽子烈其有焉晚



節說祖珽撰御覽書成加特進又白珽令其子辟彊預修御覽辟彊無才藝為人所嗤鄙及珽被黜便布言于朝云先有嫌隙及鄧長顓顏之推奏立文林館之推本意不欲令耆舊故人知之休之便相附會與少年朝請參軍之徒同入待詔時論貶焉魏收監史之日立神武本紀取平四胡之歲為齊元收在齊州恐史官改奪其志上表論之及收還朝勅集朝賢議其事休之立議從天保為限斷魏收存日猶兩議未決收死後便諷動內

外發詔從其議後領中書監便謂人云我已三為中書  
監用此何為隆化還鄴舉朝多有遷授封休之燕郡王  
又謂其所親云我非蠻奴何意忽有此授凡此諸事皆  
為時論所鄙好學不倦遂博綜經史文章雖不華靡亦  
為典正魏收在日深為收所輕收卒後以先達見推位  
望雖高虛懷接物為縉紳所愛重周武平齊休之與吏  
部尚書袁聿修衛尉卿李祖欽度支尚書元修伯大理  
卿司馬幼之司農卿崔達拏祕書監源宗散騎常侍兼

中書侍郎李若散騎常侍兼給事黃門侍郎李孝貞給  
事黃門侍郎盧思道給事黃門侍郎顏之推通直散騎  
常侍兼中書侍郎李德林通直散騎常侍兼中書舍人  
陸乂中書侍郎薛道衡中書舍人元行恭辛德源王劭  
陸開明十八人同徵令隨駕後赴長安尋除開府儀同  
依例封臨澤縣男歷納言中大夫太子少保進位上開  
府除和州刺史隋開皇二年罷任終於洛陽所著文集  
四十卷又撰幽州人物志並行於世初休之在洛將仕

夜夢見黃河北驛道上行從東向西道南有一家極高  
大休之步登冢頭見一銅柱跌為蓮花形休之從西北  
登一柱礎上以手捉一柱柱遂右轉休之呪曰柱轉三  
匝吾至三公柱遂三匝而止休之尋寤意如在鄴城東  
南者其夢竟驗云子辟彊字君大性疎脫無才藝休之  
亦引入文林館為時人所嗤鄙武平末為尚書水部郎  
中休之弟緄之天平中入關次俊之位兼通直常侍聘  
陳副尚書郎當文襄時多作六言歌辭淫蕩而拙世俗

流轉名為陽五伴侶寫而賣之在市不絕俊之嘗過市  
取而改之言其字誤賣書者曰陽五古之賢人作此伴  
侶君何所知輕敢議論俊之大喜後待詔文林館自言  
有文集十卷家兄亦不知吾是才士也休之從祖弟斐  
字叔鸞父藻魏瀛州安東府長史斐魏孝莊時於西兗  
州督護流人有功賜爵方城伯歷廣平王開府中郎修  
起居注除起部郎中兼通直散騎常侍聘梁梁尚書羊  
侶魏之叛人也與斐舊故欲召斐至宅三致書斐不答

梁人曰羊來已久經貴朝遷革李盧亦詣宅相見卿何  
致難斐曰柳下惠則可吾不可梁武帝又親謂斐曰侶  
極願相見今二國和好安得復論彼此斐終辭焉還除  
廷尉少卿石濟河溢橋壞斐移津於白馬中河起石渾  
兩岸造關城累年乃就東郡太守陸士佩以黎陽關河  
形勝欲因山壑以為公家苑囿斐書答以國步始康人  
勞未息誠宜輕徭薄賦勤恤民隱不從天保中除都水  
使者詔斐監築長城累遷殿中尚書以本官監瀛州事

拜儀同三司卒贈中書監北豫州刺史諡曰簡子師孝  
中書舍人斐從叔昭字元景學涉史傳尤閑案牘為文  
襄府墨曹參軍甚見親委與陳元康崔暹等參謀機密  
及崔陵為崔暹所告昭劾成其獄賴邢子才為陵申雪  
以免昭由是為時論所不與初文襄擇日將受魏禪令  
昭等定儀注草詔冊并授官未畢而文襄殂罷府天保  
初除給事黃門侍郎後以風氣彌留不堪近侍出除青  
州高陽內史卒於郡文集十卷子靜立性淳孝操履清

方美詞令善尺牘仕齊位三公郎中隋開皇初州主簿  
李稚廉趙郡高邑人也父紹魏殷州別駕兄義深梁州  
刺史義深自有傳稚廉少而寡欲為兒童時初不從人  
有所求請家人故以金寶授之終不取彊付之輒擲於  
地州牧以其蒙稚而廉故以名焉稚廉聰敏好學年十  
五頗尋覽五經章句釋褐奉朝請累除文襄驃騎府長  
史文襄薦為濟州儀同府長史又遷瀛州長史神武行  
經冀州部總合河北六州文籍商權戶口增損神武親



自部分多在馬上徵責文簿指影取備事緒非一雅廉  
每應機立成當先期會莫不雅合深旨為諸州準的神  
武嘗謂司馬子如曰觀雅廉處分快人意也因集文武  
數十人令郎中杜弼宣旨慰勞仍詰諸州刺史守令等  
曰碎卿等諸人作得李長史一脚指不足時諸人並謝  
罪雅廉獨前拜恩觀者咸歎美之賜以牛酒神武還并  
州以告文襄文襄喜謂人曰吾足知人矣文襄嗣事召  
詣晉陽除霸府掾文襄謂杜弼曰并州王者之基須好

長史令各舉所知多不見納文襄後因大集乃謂陳元康曰我教君好長史處李稚廉即其人也遂命為并州長史常在文襄第內與隴西辛術等六人號為館客待以上賓之禮天保初為太原太守文宣嘗召見問以治方語及政刑寬猛帝終欲深文稚廉固以為非帝意不悅又與語及楊愔稚廉誤稱為楊公以應對失宜除濟陰太守累遷太僕大司農二卿趙州大中正大理卿所在稱職後主時和士開權重百僚盡傾稚廉高揖而已

由是出為南青州刺史州主簿徐乾富而暴橫歷政不能禁稚廉初至因其有犯收繫之乾密通疏奉黃金百挺婢妓二十人稚廉不受遂殺之罷還鄴初孝徵執政求紫石英於稚廉以其南青州所出稚廉辭無好者固請乃與二兩孝徵有不平之言或以告稚廉稚廉抗聲曰李稚廉結髮從官誓不曲意求人天生德於予孝徵其如予何假欲挫頓不過遣向并州耳時已授并省都官尚書辭而未報遂發勅遣之齊末官至三品已上悉

加儀同稚廉獨不需此例語人曰我不作儀同更覺為  
榮耳卒贈吏部尚書稚廉族弟神威幼有風裁家業禮  
學又善音樂撰集樂書近百卷卒於尚書左丞又有李  
翥字彥鴻世居栢人弱冠以文章知名仕齊位東平太  
守後待詔文林館除通直散騎常侍聘于梁晚節頗以  
貪酒為累貧無居宅寄止佛寺中常著巾帔終日對酒  
招致賓客風調詳雅翥從父兄子朗翥之流亞無有吏  
能位中書舍人

王昕字元景北海劇人也六世祖猛秦苻堅丞相家於  
華山之鄜城祖凝魏孝文世為內都大官父雲位南兗  
州刺史昕少篤學能誦書日以中疊舉手極上為率與  
太原王延業俱詣魏安豐王延明延明歎美之太尉汝  
南王悅辟為騎兵參軍舊事王出騎兵則武服持刀陪  
從昕耻之未嘗肯依行列悅好逸遊或馳騁信宿昕輒  
棄還悅乃令騎兵在前手為驅策昕捨轡高拱任馬所  
之左右言其誕慢悅曰府望唯在此賢不可責也悅數

散錢於地令諸佐爭拾之昕獨不拾悅又散銀錢以目  
昕昕乃取其一悅與府僚飲酒起自移牀人爭進手昕  
獨執版却立悅於是作色曰我帝孫帝子帝弟帝叔今  
為宴適親起輿牀卿何人也獨為偃蹇對曰王元景位  
望微劣不足使殿下式瞻儀刑安敢以親王寮案從廝  
養之役悅謝焉在坐皆引滿酣暢昕先起卧於閑室頻  
召不至悅乃自詣呼之曰懷其才而忽府主可謂仁乎  
昕曰商辛沈湎其亡也忽諸府主自忽傲寮佐敢任其

咎悅大笑而去後除著作佐郎以兵亂漸起將避地海隅侍中李琰之黃門侍郎王遵業惜其名士不容外任奏除尚書右外兵郎中出為光州長史故免河陰之難遷東萊太守于時年凶人多相食昕勤恤民隱多所全濟昕少時與河間邢邵俱為元羅賓友及守東萊邵舉室就之郡人以邵是邢杲從弟會兵將執之昕以身蔽伏其上呼曰欲執我才當先執我邵乃免太昌初還洛吏部尚書李神儁奏言比因多故常侍遂無員限今以

王元景等為常侍定限八員加金紫光祿大夫孝武或時袒露與近臣戲狎每見昕即正冠而斂容焉昕體素肥遭喪後遂終身羸瘠楊愔重其德業以為人之師表元象元年兼散騎常侍聘梁魏收為副並為朝廷所重使還高隆之求貨不得諷憲臺劾昕收在江東大將商人市易並坐禁止文襄營救之累遷祕書監昕雅好清談詞無淺鄙在東萊時獲殺其同行侶者詰之未服昕謂之曰彼物故不歸卿無恙而返何以自明邢邵後見



文襄言及此以為笑樂昕聞之故詣邵曰卿不識造化還謂人曰子才應死我罵之極深頃之以被謗左遷陽平太守在郡有稱績文襄謂人曰王元景殊獲我力由吾數戲之其在吏事遂為良二千石文宣踐阼拜七兵尚書以參儀禮封宜君縣男嘗有鮮卑聚語崔昂戲問昕曰頗解此不昕曰樓羅樓羅實自難解時唱染干似道我輩文宣以昕疏誕非濟世才罵曰好門戶惡人身又有讒之者云王元景每嗟水運不應遂絕帝愈怒乃

下詔曰元景本自庸才素無勲行早霑纓紱遂履清途  
發自畿邦超居詹事俄佩龍文之劔仍啟帶礪之書語  
其器分何因到此誠宜清心勵已少酬萬一尚書百揆  
之本庶務攸歸元景與奪任情威福在已能使直而為  
枉曲反成絃害政損公名義安在偽賞賓郎之味好詠  
輕薄之篇自謂模擬儉楚曲盡風制推此為長餘何足  
取此而不繩後將焉肅在身官爵宜從削奪於是徙幽  
州為百姓昕任運窮通不改其操未幾徵還奉勅送蕭

莊於梁為主除銀青光祿大夫判祠部尚書事帝怒臨  
漳令嵇暕及舍人李文師以日賜薛豐洛文師賜崔士  
順為奴鄭子默私誘昕曰自古無朝士作奴昕曰箕子  
為之何言無也子默遂以昕言啟文宣仍曰王元景比  
陛下於商辛楊愔微為解之帝謂愔曰王元景是爾博  
士爾語皆元景所教帝後與羣臣酣飲昕稱病不至帝  
遣騎執之見方搖膝吟詠遂斬於御前投尸漳水天保  
十年也天統末追贈吏部尚書有文集二十卷子顗嗣

卒於燕郡太守昕母清河崔氏有學識風訓生九子並風流蘊藉世號王氏九龍昕弟暉昭晞皓最知名暉字元旭少與昕齊名兼多藝術卒於中書舍人贈兗州刺史昭字仲亮少好儒術又頗以武藝自許性敦篤以友悌知名卒於考功郎中晞字叔朗小名沙彌幼而孝謹淹雅有器度好學不倦美容儀有風則魏末隨母兄東適海隅與邢子良遊處子良愛其才悟與其在洛兩兄書曰賢弟彌郎意識深遠曠達不虧簡於造次言必詣

理吟詠情性麗絕當時恐足下方難為兄不假慮其不  
進也魏永安初第二兄暉聘梁啟晞釋褐除員外散騎  
侍郎徵署廣平王開府功曹史晞願養母竟不受署母  
終之後仍屬遷鄴遨遊鞏洛樂其山水與范陽盧元明  
魏季景結侶同契往天陵山浩然有終焉之志及西魏  
將獨孤信入洛署為開府記室晞稱先被犬傷困篤不  
赴有故人疑其所傷非獒書勸令赴晞復書曰辱告存  
念見令起疾循復眷旨似疑吾所傷未必是獒吾豈願

其必獬但理契無疑耳就足下疑之亦有過說足下既疑其非獬亦可疑其是獬其疑半矣若疑其是獬而營護雖非獬亦無損疑其非獬而不療儻是獬則難救然則過療則至萬全過不療或致於死若王晞無可惜也則不足取既取之療是可惜奈何奪其萬全任其或死且將軍威德所被颺飛霧襲方掩八紘豈在一介若必從隗始先須濟其生靈足下何不從容為將軍言也於是方得見寬俄而信返晞遂歸鄴神武訪朝廷子弟忠

孝謹密識達淹通者令與諸子遊晞與清河崔贍頗丘  
李度范陽盧正通首應此選文襄時為大將軍握晞等  
手曰我弟並向成長志識未定近善狎惡不能不移吾  
弟不負義方卿祿位常亞吾弟若苟使回邪致相誑誤  
臯及門族非止一身晞隨神武到晉陽補中外府功曹  
參軍帶恒山王演友天保初行太原郡事及文宣昏逸  
恒山王演數諫爭帝疑王假辭於晞欲加大辟王私謂  
晞曰王博士明日當作一條計事欲為相活亦圖自全

宜深體勿怪乃於衆中杖晞二十帝正發怒聞晞得杖以故不殺髡鞭鉗配甲坊居三年王又固諫大被毆撻閉口不食太后極憂之帝謂左右曰儻小兒死奈我老母何於是每臨王疾謂王努力彊食當以王晞還汝乃釋晞令往王第王抱晞曰吾氣息惛然恐不復相見晞流涕曰天道神明豈令殿下遂斃此舍至尊親為人兄尊為人主安可與計殿下不食太后亦不食殿下縱不自惜不惜太后乎王於是彊坐而飯晞由是得免徒還



為王友王復錄尚書事新除官者必詣王謝職去必辭  
晞言於王曰受爵天朝拜恩私第自古以為干紀朝廷  
文武出入辭謝宜一皆約絕主上顓顓賴殿下扶翼王  
深納焉王嘗從容謂晞曰主上起居不恒卿耳目所具  
吾豈得以前逢怒遂爾結舌卿宜撰諫草吾當伺間極  
諫晞遂條十餘事以呈因復切諫王曰比干彊諫不量  
時之可否雖忘身於剗剖而致本朝以危亡今朝廷乃  
爾欲學介子匹夫輕一朝之命且狂藥令人不自覺刀

箭豎復識親疎一旦禍出理外將奈殿下家業何奈皇太后何且乞將順日慎一日王獻歛不自勝曰乃至是乎明日見晞曰吾長夜九思今便息意命火對晞焚之其後王見危機轉切承間苦諫遂致忤旨大被困辱帝使力士反接伏白刃注頸王曰臣不忍見宗廟阽危乞早行決帝罵之曰小子何知乃以吏才非我是誰教汝王曰天下噤口除臣誰敢有言帝催遣捶楚亂杖數十會醉卧得解爾後褻黷之好徧於宗族所在留連俚晝

作夜唯常山邸多無適而去及帝崩濟南嗣立王謂晞  
曰一人垂拱吾曹亦頗優閑因言朝廷寬仁慈恕真守  
文之良主也晞曰天保享祚左右無柱石之才東宮委  
一胡人令習鞭轡自幼而長不聞雅正今卒覽萬機駕  
馭雄桀如聖德幼沖未堪多難殿下宜朝夕承旨而勿  
使他姓貴戚出納詔命必致矯弄權有所歸殿下雖欲  
守藩職樂為善其可得乎假令得遂沖退自審家祚保  
靈長不王默然思念久之曰何以處我晞曰周公抱成

王以朝諸侯攝政七年然後復子明辟幸有故事惟殿下慮之他日王又問晞曰外人有何議論對曰見源文宗云錄王宜居內夾輔不可出外又陽休之亦云昔周公朝讀百篇書夕見七十士猶恐不得人錄王何所嫌疑乃爾不接賓客王曰我安敢自擬周公晞曰殿下今日地望欲避周公得邪王不答帝臨發速王從駕除晞并州長史及王從至鄴誅楊燕等詔以王為大丞相都督中外諸軍事督攝文武還并州及至延晞內齋謂曰

近人說吾在京舉措何如晞曰伏聞殿下精誠感天誅  
五罪而天下服往日奉辭恐二儀崩墜何悟神武潛斷  
朝廷廓清王曰不早用卿言使羣小弄權幾至傾覆今  
君側雖清終當何以處我晞曰殿下將往時位地猶可  
以名教出處今日事勢遂關天時非復人理所及有頃  
奏趙郡王叡為左長史晞為司馬每夜載入晝則不與  
語以晞儒緩將不允武將之意後進晞密室曰比王侯  
諸貴每見煎迫言我違天不祥恐當或有變起吾正欲

以正法繩之晞曰朝廷比者疎遠親戚寧思骨肉之重  
殿下倉卒所行非復人臣之事芒刺在背交戟入頸上  
下相疑何由可久天道不常虧盈迭至神幾變化矜蠻  
斯集雖執謙挹粃糠神器便是違上元之意墜先人之  
基王曰卿何敢須發非所宜言須致卿於法晞曰竊謂  
天時人事同無異揆是以冒犯雷霆不憚斧鉞今日得  
披肝膽抑亦神明攸贊王曰拯難匡時方俟聖哲吾何  
敢私議幸勿多言尋有詔以丞相任重普進府僚一班

晞以司馬領吏部郎中丞相從事中郎陸杳將出使臨別握晞手曰相王功格區宇天下樂推歌謠滿道物無異望杳等伏隸願披赤心而忽奉外使無由面盡短誠寸心謹以仰白晞尋述杳言王曰若內外咸有異望趙彥深朝夕左右何因都無論自以卿意試密與言之晞以事隙問彥深彥深曰我比亦驚此音謠每欲陳聞則口噤身戰弟既發論吾亦欲昧死一披肝膽因亦同勸是時諸王公將相日日勸請四方岳牧表陳符命乾明

元年八月孝昭帝踐阼除散騎常侍仍領兼吏部郎中  
後因奏事罷帝從容曰比日何為自同外客略不可見  
自今假非局司但有所懷隨宜作一牒候少隙即徑進  
也因勅尚書陽休之鴻臚卿崔劼等三人每日本職務  
罷並入東廊共舉錄歷代廢禮墜樂職司廢置朝饗異  
同輿服增損或道德高雋久在沈淪或巧言眩俗妖邪  
害政爰及田市舟車徵稅通塞婚葬儀軌貴賤等衰有  
不便於時而古今行用不已者或自古利用而當今毀



棄者悉令詳書以漸條奏未待頓備遇憶續聞朝晡給  
典御食畢景聽還時百官請建東宮勅未許每令晞就  
東堂監視太子冠服導引趨拜尋為太子太傅晞以局  
司奉璽授皇太子太子釋奠又兼中庶子帝謂曰今既  
當劇職不得尋常舒慢也帝將北征勅問比何所聞晞  
曰道路傳言車駕將行帝曰庫莫奚南侵我未經親戎  
因此聊欲習武晞曰鑾駕巡狩為復可爾若輕有征戰  
恐天下失望帝曰此懦夫常慮吾自當臨時斟酌帝使

齊帥裴澤主書蔡暉伺察羣下好相誣枉朝士呼為裴  
蔡時二人奏車駕北征後陽休之王晞數與諸人遊宴  
不以公事在懷帝杖休之晞脛各四十帝斬人於前而  
問晞曰此人合死否晞曰罪實合死但恨其不得其地  
臣聞爵人於朝與士共之刑人於市與衆棄之殿廷非  
殺戮之所帝改容曰自今已後當為王公改之帝欲以  
晞為侍中苦辭不受或勸晞勿自疎晞曰我少年已來  
閱要人多矣充詘少時鮮不敗績且性實疎緩不堪時

務人主恩私何由可保萬一披猖求退無地非不愛作  
熱官但思之爛熟耳百官嘗賜射晞中的當得絹為不  
書箭有司不與晞陶陶然笑曰我今段可謂武有餘文  
不足矣晞無子帝將賜之妾使小黃門就宅宣旨皇后  
相聞晞妻晞令妻答妻終不言晞以手撩眉而退帝聞  
之笑孝昭帝崩晞哀慕殆不自勝因以羸敗武成本忿  
其儒緩由是彌嫌之因奏事大被呵叱而雅步晏然歷  
東徐州刺史祕書監武平初遷大鴻臚加儀同三司監

修起居注待詔文林館晞性閑淡寡欲雖王事鞅掌而  
雅操不移久在并州戎馬闐閭未嘗以世務為累良辰  
美景嘯詠遨遊登臨山水以談燕為事人士謂之方外  
司馬嘗詣晉祠賦詩曰日落應歸去魚鳥見留連忽有  
相王使召晞不時至明日丞相西閣祭酒盧思道問晞  
曰昨被召已來頗得無以魚鳥致怪晞緩笑曰昨晚陶  
然頗以酒漿被責卿輩亦是留連之一物豈直魚鳥而  
已及晉陽陷敗與同志避周兵東北走山路險迫懼有

土賊而晞溫酒服膏魯不一廢母不肯疾去行侶尤之  
晞曰莫尤我我行事若不悔作三公矣齊亡周武帝以  
晞為儀同大將軍太子諫議大夫隋開皇元年卒於洛  
陽年七十一贈儀同三司曹州刺史皓字季高少立名  
行為士友所稱遭母憂居喪有至性儒緩亦同諸兄嘗  
從文襄北征乘赤馬且蒙霜氣遂不復識自言失馬虞  
候為求覓不得須臾日出馬體霜盡繫在幕前方云我  
馬尚在為司徒掾在府聽午鼓蹀躞待去羣寮嘲之曰

王七思歸何太疾季高曰大鵬始欲舉燕雀何啾唧嘲者曰誰家屋當頭鋪首浪遊逸於是喧笑季高不復得言大寧初兼散騎常侍聘陳使主天統末修國史尋除通直散騎常侍卒贈郢州刺史子伯奉朝請待詔文林館皓弟暉字季炎卒於滄州司馬

崔昂字懷遠博陵安平人祖挺魏幽州刺史父孝偉趙郡太守挺自有傳昂年七歲而孤伯父吏部尚書孝芬嘗謂所親曰此兒終當遠致是吾家千里駒也昂性端

直少有志略頗綜文詞天平二年文襄引為記室參軍  
委以腹心之任及輔朝政召為開府長史并攝京畿長  
史時勲將親族賓客在都下放縱多行不軌孫騰司馬  
子如之門尤劇昂受文襄密旨以法繩之未幾之間內  
外齊肅尋遷司徒右長史時左府有陽平人吳賓為妾  
認繼嗣事披訴經久長史王昕郎中鄭憑掾盧斐屬王  
敬寶等窮其獄始末積年鞠掠不獲實司徒妻昭付昂  
推問即日詰根緒獲其真狀昭歎曰左府都官數人不

如右府一長史所憑甚以為愧武定中文襄普令內外  
極言得失昂上書曰屯田之設其來尚矣曹魏破蜀業  
以興師馬晉平吳兵因取給朝廷頃以懷洛兩邑鄰接  
邊境創立營田儲糧果贍準此而論龜鏡非遠其幽安  
二州控帶奚賊蠕蠕徐揚兗豫連接吳越疆鄰實藉轉  
輸之資常勞私糴之費諸道別遣使營之每考其勤惰  
則人加勸勵倉廩充實供軍濟國實謂在茲其次法獄  
之重人命所懸頃者官司糾察多不審練乃聞緣淺入



深未有雪大為小咸以畏避嫌疑共相殘劾至如錢絹粟麥其狀難分徑指為贓罪從此定乞勅羣司務存獲實如此則有息將來必無枉濫文襄納之後除尚書左丞其年又兼度支尚書左丞之兼尚書近代未有朝野榮之度支水漕陸運昂設轉輸相入之差付給新陳之法有利於人遂為常式右僕射崔暹奏請海沂煮鹽有利軍國文襄以問昂昂曰亦既官煮須斷民竈官力雖多不及人廣請準關市薄為竈稅私館官給彼此有宜

朝廷從之武定六年甘露降宮闕文武同賀顯陽殿魏  
帝問僕射崔暹尚書楊愔崔陵邢邵散騎常侍魏收御  
史中丞陸操國子祭酒李澤等曰自古甘露為瑞漢魏  
多少可各言往代所降之處德化感致所由次至昂曰  
案瑞圖王者德至於天則甘露降吉凶兩門不由符瑞  
故桑雉之戒實啟中興小鳥孕大未聞福感所願陛下  
雖休勿休允答天意魏帝為斂容後攝都官尚書上勸  
田事七條尋兼太府卿齊受禪遷散騎常侍兼太府卿

大司農卿二寺所掌世號繁劇昂校理有術下無姦偽  
又奏上橫市妄費事三十四條其年與太子少師邢邵  
議定國初禮式仍封華陽縣男又詔刪定律令損益禮  
樂令尚書右僕射薛琚等四十三人在領軍府議定帝  
尋幸晉陽將發敕遞相遵率不者令昂以聞昂部分科  
條校正今古所增損十有七八轉廷尉卿昂性清嚴見  
黷貨之輩嫉之如讎是以治獄文深世論不以平恕相  
許又與尚書盧斐別典京畿詔獄並有殘刻之聲至於

推繩大事理可明言是非不至冤酷有濮陽人沈子遐  
齋侯景鐵券告徐州都督府長史畢義緒期舉兵應景  
又衛尉卿杜弼門生郝子寬告弼誹謗并與元子雄謀  
逆帝甚怒付昂窮鞫昂皆執正雪免告者引妄獲罪天  
保三年除度支尚書時有餽藏小吏因內臣投書告事  
又別有飛書告事者並付昂窮檢昂言笑間咸得情告  
者辭窮並引嫌狀於是飛書遂絕轉都官尚書仍兼都  
官事食濟北郡幹文宣嘗幸東山百官預宴升射堂帝

召昂於御座前謂曰舊人多出為州我欲以臺閣相付  
當用卿為令僕勿望刺史卿六十外當與卿本州中間  
州不可得也後九卿已上陪集東宮帝指昂及尉瑾司  
馬子瑞謂太子曰此是國家柱石汝宜記之未幾復侍  
宴金鳳臺帝歷數諸人咸有罪負至昂則曰崔昂直臣  
魏收才士婦兄妹夫俱省罪過十年策拜儀同燕子獻  
百司陪列帝謂昂曰歷思羣臣可綱紀省闈者唯卿一  
人耳遂除兼右僕射數日後昂因入奏事帝謂尚書令

楊愔曰昨不與崔昂正者言其太速明日即拜為真未  
幾還為兼楊愔少時與昂不平文宣崩後遂免昂右僕  
射除開府儀同三司光祿勳皇建元年轉太常卿河清  
元年兼御史中丞太常如故昂從甥李公統坐高歸彥  
事誅依律婦人年六十以上免配宮時公統母年始五  
十餘而稱六十公統舅宣寶求吏以免其姊昂弗知錄  
尚書彭城王浹發其事竟坐除名三年復為五兵尚書  
遷祠部天統元年卒贈趙州刺史昂有風調才識立朝

有堅正剛直之名然好揣上意感激時主或陳便宜蠲  
省或列陰私罪失深為文宣所知賞發言獎護人莫之  
能毀議曹律令京畿密獄及朝之大事多以委之昂情  
尚嚴猛好行鞭撻雖苦楚萬端對之自若前則崔暹季  
舒為之親援後乃高德正是其中表常有挾持意色矜  
高以此不為名流歸服有五子第三子液字君洽頗習  
文藻有學涉風儀器局為時論所許以奉朝請待詔文  
林館隋開皇中為中書侍郎

崔季舒字叔正昂從曾祖子瑜之子也子瑜仕魏位鴻臚少卿季舒少孤性明敏涉獵經史長於尺牘有當世才具年十七為州主簿為大將軍趙郡公琛所器重言之神武神武親簡丞郎補季舒大行臺都官郎中文襄輔政轉大將軍中兵參軍甚見親寵以魏帝左右須置心腹擢拜中書侍郎文襄為中書監移門下機事總歸中書又季舒善音樂故內伎亦回隸焉內伎屬中書自季舒始也文襄每進書魏帝有所諫請或文辭繁雜季



舒輒修飾通之得申勸戒而已靜帝報答霸朝恒與季舒論之云崔中書是我姒母轉給事黃門侍郎領主衣都統雖迹在魏朝而心歸霸府密謀大計皆得預聞於是賓客輻湊傾身接禮甚得名譽勢傾崔暹暹嘗於朝堂屏人拜之曰暹若得僕射皆叔父之恩其權重如此時勲貴多不奉法文襄無所縱捨外議以季舒及崔暹等所為甚被怨嫉及文襄遇難文宣將赴晉陽黃門郎陽休之勸季舒從曰一日不朝其門容乃季舒性愛聲

色心在閑放遂不請行欲恣其行樂司馬子如緣宿憾  
及尚食典御陳山提等列其過狀由是季舒及暹各鞭  
二百徙北邊天保初文宣知其無罪追為將作大匠再  
遷侍中俄兼尚書左僕射儀同三司大被恩遇乾明初  
楊愔以文宣遺旨停其僕射遭母喪解任起服除光祿  
勳兼中兵尚書出為齊州刺史坐遣人度淮互市亦有  
贓賄事為御史所劾會赦不問武成居蕃曾病文宣令  
季舒療病備盡心力太寧初追還引入慰勉累遷度支

尚書開府儀同三司營昭陽殿敕令監造以判事式為  
胡長仁密言其短出為西兗州刺史為進典籤於吏部  
被責免官又以詣廣寧王宅決韋鞭數十及武成崩不  
得預於哭泣久之除膠州刺史遷侍中開府食新安河  
陰二郡幹加左光祿大夫待詔文林館監撰御覽加特  
進監國史季舒素好圖籍莫年轉更精勤兼推薦人士  
獎勸文學議聲翕然遠近稱美祖珽受委奏季舒總監  
內作珽被出韓長鸞以為珽黨亦欲出之屬車駕將適

晉陽李舒與張雕議以為壽春被圍大軍出拒信使往還須稟節度兼道路小人或相驚恐云大駕向并州畏避南寇若不啟諫必動人情遂與從駕文官連名進諫時貴臣趙彥深唐邕段孝言等初亦同心臨時疑貳季舒與爭未決長鸞遂奏云漢兒文官連名總署聲云諫止向并州其實未必不反宜加誅戮帝即召已署表官人集含章殿以季舒張雕劉逖封孝琰裴澤郭遵等為首並斬之殿庭長鸞令棄其屍於漳水自外同署將加

鞭撻趙彥深執諫獲免季舒等家屬男女徙北邊妻女  
及子婦配奚官小男下蠶室沒入貲產季舒本好醫術  
天保中於徙所無事更銳意研精遂為名手多所全濟  
雖位望轉高未嘗懈怠縱貧賤廝養亦為之療護庶子  
長君尚書右外兵郎中次鏡元著作佐郎並流於長城  
未幾季舒等六人妻以年老放出後南安王思好更稱  
朝廷罪惡以季舒等見害為辭悉召六人兄弟子姪隨  
軍趣晉陽事敗長君等並從戮六人之妻又追入宮周

武帝滅齊詔斛律光與季舒等六人同被優贈季舒贈  
開府儀同大將軍定州刺史

高德正渤海蓆人也曾祖祐魏光祿大夫祖和璧中書  
博士父顥輔國將軍朝散大夫祐附高允傳德正幼而  
敏慧有風神儀表文宣引為儀同開府參軍知管記事  
甚相親狎神武又擢為相府掾委以腹心遷黃門侍郎  
方雅周慎動見稱述文襄嗣業如晉陽文宣在鄴居守  
令德正參掌機密彌見親重文襄暴崩事出倉卒羣情

草草勲將等以纘戎事重勸帝早赴晉陽帝亦回遑不能自決夜中召楊愔杜弼崔季舒及德正等始定策焉以楊愔從令德正居守以為相府司馬專知門下事德正與文宣舊相昵愛言無不盡散騎常侍徐之才及館客宋景業先為天文圖讖之學又陳山提家客楊子術有所援引並因德正勸文宣行禪代之事德正又披心固請文宣便發晉陽至平城都召諸勲將入告以受禪之事諸將愕然莫敢答者時長史杜弼密啟文宣云關

西是國家勍敵若今受魏禪恐其自稱義兵挾天子而東向王將何以待之徐之才云今若先受魏禪關西自應息心縱欲屈彊止當逐我稱帝譬如逐兔滿市一人得之衆心皆定弼無以對文宣以衆人意未協又先得太后旨云汝父如龍汝兄如虎皆以帝王之重不敢妄據尚以人臣終汝何容欲行舜禹事此正是高德正教汝又說者以為昔周武王再駕盟津然後革命於是乃旋晉陽自是居常不悅徐之才宋景業等每言卜筮雜



占陰陽緯候必宜以五月應天順人德正亦敦勸不已  
仍白帝追魏收收至今撰禪代詔冊九錫建臺及勸進  
文表至五月初文宣發晉陽德正又錄在鄴諸事條進  
於文宣文宣令陳山提馳驛齎事條并密書與楊愔山  
提於五月至鄴楊愔即召太常卿邢邵七兵尚書崔陵  
度支尚書陸操太子詹事王昕給事黃門侍郎陽休之  
中書侍郎裴讓之等議撰儀注六日要魏太傅咸陽王  
坦錄尚書事濟陰王暉業等總集引入北宮留于東齋

受禪後乃放還宅文宣發至前亭所乘馬忽倒意甚惡之至平城都便不復肯進德正與徐之才苦請曰山提先去恐其漏泄不果即命司馬子如杜弼馳驛續入觀察物情七日子如等至鄴衆人以事勢已決無敢異言九日文宣至城南頓所時既未行詔敕諸公文書唯云奉約束德正及楊愔宣署而已受禪日堯難宗染赤雀以獻帝尋知之亦弗責也是日即除德正為侍中又領宗正卿尋遷吏部尚書侍中如故封藍田縣公天保七

年遷尚書右僕射兼侍中食勃海郡幹德正與尚書令  
楊愔綱紀朝政多有弘益文宣末年縱酒酣醉德正屢  
進忠言帝不悅又謂左右云高德正恒以精神陵逼人  
德正甚憂懼乃移疾屏居佛寺兼學坐禪為退身之計  
帝謂楊愔曰我大憂高德正其疾何似愔知帝內忌之  
由是答云陛下若用作冀州刺史病即自瘥帝從之德  
正見除書而起帝大怒謂曰聞爾病我為爾鍼親以刀  
子刺之血流霑地又使曳下斬去其趾劉桃枝捉刀不

敢下帝起臨陛切責桃枝桃枝乃斬足之三趾帝怒不解禁德正於門下省其夜開城門以羶輿送還家旦日德正妻出寶物滿四牀欲以寄人帝奄至其宅見而怒曰我府藏猶無此物詰其所從得皆諸元賂之也遂曳出斬之妻出拜謝又斬之并其子司徒東閣祭酒伯堅亦見害後文宣謂羣臣曰高德正常言宜用漢人除鮮卑此即合死又教我誅諸元我今殺之為諸元報讎也帝後悔贈太保冀州刺史諡曰康嫡孫王臣襲爵藍田

縣公給事中通直散騎侍郎德正次子仲武京畿司馬  
太原太守

尉瑾代人也父慶賓魏光祿大夫贈司空瑾少而敏悟  
好學慕善以國姓門資稍遷直後司馬子如執政瑾娶  
其甥皮氏為妻由此除中書舍人後除吏部郎中文襄  
崩文宣命瑾在鄴北宮與高德正典機密天保中累遷  
七兵尚書侍郎孝昭輔政除吏部尚書武成踐阼趙彥  
深本子如賓僚元文遙和士開並帝鄉故舊共相薦達

任遇彌重又吏部銓衡所歸事多祕密由是朝之機事頗亦預聞後為尚書右僕射卒武成方在三臺饗宴文遙奏聞遂命徹樂罷飲瑾外雖通顯內闕風訓閨門穢雜為世所鄙有女在室忽從奔誘瑾遂以適婦姪皮逸人瑾又通寡嫂元氏瑾嘗譏吏部郎中頓丘李構云郎不稽古構對令史云我誠不稽古未知通嫂得作稽古不瑾聞大慙然亦能折節下士意在引接名流但不之別也有賈彥始者儀望雖是儒生瑾稱堪充聘使司徒

戶曹祖崇儒文辯俱劣瑾言將為當世莫及好學吳人  
搖脣振足為人所哂見人好笑時論比之寒蟬又少威  
儀子德載以蒲鞭責之便自投井瑾自臨井上呼云兒  
出聞者皆笑及位任重便大躁急省內郎中將論事者  
逆即嗔罵既居大選彌自驕狠皮子賤恃其親通多所  
談薦大有受納瑾死後其弟靜忿而發之子賤坐決鞭  
二百配北營州瑾初為聘梁使梁人陳昭善相謂瑾曰  
二十年後當為宰相瑾出昭謂人曰此公宰相不過三

年當死昭後為陳使主兼散騎常侍至齊瑾時兼右僕射鳴騶饒吹昭復謂人曰二年當死果如言焉德載位通直散騎侍郎

通志卷一百五十三





總校官庶吉士臣侍朝

校對官庶吉士臣陳文樞

謄錄監生臣趙興吾